

舊五代史

五



舊五代史卷二十五

宋司空同中書門下平章事薛居正等撰

武皇紀上

唐書一

太祖武皇帝諱克用本姓朱耶氏其先隴右金城人也
始祖拔野唐貞觀中爲墨離軍使從太宗討高麗薛延
陀有功爲金方道副都護因家于瓜州太宗平薛延陀
諸部于安西北庭置都護屬之分同羅僕骨之人置沙
陀都督府蓋北庭有磧曰沙陀故因以爲名焉永徽中
以拔野爲都督其後子孫五世相承曾祖盡忠貞元中
繼爲沙陀府都督旣而爲吐蕃所陷乃舉其族七千帳

徙于甘州盡忠尋率部眾三萬東奔俄而吐蕃追兵大

至盡忠戰歿祖執宜卽盡忠之長子也收合餘眾至于

靈州德宗命爲陰山府都督元和初入爲金吾將軍遷

蔚州刺史代北行營招撫使

案新唐書沙陀傳元和三年盡忠款靈州塞詔處其

部鹽州置陰山府以執宜爲府兵馬使朝長安授特進

金吾衛將軍從攻鎮州進蔚州刺史破吳元濟授檢校

刑部尙書長慶初破賊深州入朝留宿衛拜金吾衛將

軍太和中授陰山府都督代北行營招撫使所載官爵

詳略先後莊宗卽位追諡爲昭烈皇帝廟號懿祖烈考

與薛史異國昌本名赤心唐朔州刺史咸通中討龐勛有功入爲

金吾上將軍賜姓李氏名國昌

案代州有唐故龍武軍統軍檢校司徒贈太保

隴西李公神道碑云

公諱國昌字德興仍係鄭王房出爲振武節度使尋

爲吐渾所襲退保于神武川及武皇鎮太原表爲代北

軍節度使中和三年薨

案新唐書沙陀傳光啟三年國昌卒與薛史異考舊唐書僖宗

紀中和三年十月國昌卒與薛史同歐陽史亦從薛史

莊宗卽位追諡爲文皇號

獻祖武皇卽獻祖之第三子也母秦氏以大中十年丙

子歲九月二十二日生于神武川之新城在姪十三月

載誕之際母艱危者竟夕族人憂駭市藥于雁門遇神

叟告曰非巫醫所及可馳歸盡率部人被甲持旄擊鉦

鼓躍馬大噪環所居三周而止族人如其教果無恙而

生是時虹光燭室白氣充庭井水暴溢武皇始言喜軍

中語齟齬善騎射與儕類馳騁嬉戲必出其右年十三

見雙鳧翔于空射之連中眾皆臣伏新城北有毗沙天王祠祠前井一日沸溢武皇因持卮酒而奠曰予有尊主濟民之志無何井溢故未察其禍福惟天王若有神奇可與僕交談奠酒未已有神人被金甲持戈隱然出于壁間見者大驚走唯武皇從容而退繇是益自負獻祖之討龐勛也武皇年十五從征摧鋒陷陣出諸將之右軍中目爲飛虎子賊平獻祖授振武節度使武皇爲雲中牙將嘗在雲中宿于別館擁妓醉寢有俠兒持刃欲害武皇及突入曲室但見烈火熾赫于帳中俠兒駭異而退又嘗與達靼部人角勝達靼指雙鵬于空曰公

能一發中否武皇卽彎弧發矢連貫雙鵬邊人拜伏及壯爲雲中守捉使事防禦使支謨與同列晨集廨舍因戲升郡閣踞謨之座謨亦不敢詰乾符三年朝廷以段文楚爲代北水陸發運雲州防禦使時歲薦饑文楚稍削軍食諸軍咸怨武皇爲雲中防邊督將部下爭訴以軍食不充邊校程懷素王行審蓋遇李存璋薛鐵山康君立等卽擁武皇入雲州眾且萬人營于闕雞臺城中械文楚出以應于外諸將列狀以聞請授武皇旄鉞朝廷不允徵諸道兵以討之

案舊唐書懿宗紀咸通十三年十二月李國昌小男克用

殺雲中防禦使段文楚據雲州自稱防禦留後新唐書懿宗紀乾符五年二月癸酉雲中守捉使李克用殺大

同防禦使段文楚歐陽史從舊唐書通鑑從新唐書薛
史作乾符三年與諸書異據通鑑考異引趙鳳後唐太
祖紀年錄正作乾符三年趙鳳爲唐宰相
去武皇時不遠見間較確宜可徵信云 乾符五年黃

巢渡江其勢滋蔓天子乃悟其事以武皇爲大同軍節

度使

案歐陽史作拜克用爲大同軍防禦使新唐書作
以國昌爲大同軍防禦使通鑑作以國昌爲大同

節度使俱與薛史異檢校工部尙書冬獻祖出師討党項吐渾赫

連鐸乘虛陷振武舉族爲吐渾所虜武皇至定邊軍迎

獻祖歸雲州雲州守將拒關不納武皇略蔚朔之地得

三千人屯神武川之新城赫連鐸晝夜攻圍武皇昆弟

三人四面應賊俄而獻祖自蔚州引軍至吐渾退走自

是軍勢復振天子以赫連鐸爲大同軍節度使仍命進

軍以討武皇乾符六年春朝廷以昭義節度使李鈞充
北面招討使將太原之師過石嶺關屯于代州與幽州
李可舉會赫連鐸同攻蔚州獻祖以一軍禦之武皇以
一軍南抵遮虜城以拒李鈞是冬大雪弓弩弦折南軍
苦寒臨戰大敗奔歸代州李鈞中流矢而卒廣明元年
春天子復命元帥李涿率兵數萬屯代州武皇令軍使
傅文達起兵于蔚州朔州刺史高文集與薩葛安慶等
部將縛文達送于李涿六月李涿引大軍攻蔚州獻祖
戰不利乃率其族奔于達靼部居數月吐渾赫連鐸密
遣人賂達靼以離間獻祖旣而漸生猜阻武皇知之每

召其豪右射獵于野或與之百步馳射馬鞭或以懸樹
葉爲的中之如神由是部人心伏不敢竊發俄而黃巢
自江淮北渡武皇椎牛醢酒饗其酋首酒酣喻之曰予
父子爲賊臣讒間報國無由今聞黃巢北犯江淮必爲
中原之患一日天子赦宥有詔徵兵僕與公等南向而
定天下是予心也人生世間光景幾何曷能終老沙堆
中哉公等勉之達鞞知無留意皆釋然無間是歲十一
月黃巢寇潼關天子令河東監軍陳景思爲代北起軍
使收兵破賊十二月黃巢犯長安僖宗幸蜀陳景思與
李友金發沙陀諸部五千騎南赴京師友金卽武皇之

族父也

案通鑑友金初與高文集並降于李琢故得與陳景思南赴京師薛史不載

中和元

年二月友金軍至絳州將渡河刺史瞿正謂陳景思曰
巢賊方盛不如且還代北徐圖利害四月友金旋軍雁
門瞿正至代州半月之間募兵三萬營于崞縣之西其
軍皆北邊五部之眾不開軍法瞿正李友金不能制友
金謂景思曰興大眾成大事當威名素著則可以伏人
今軍雖數萬苟無善帥進亦無功吾兄李司徒父子去
歲獲罪于國家今寄北部雄武之略爲眾所推若驟騎
急奏召還代北之人一麾響應則妖賊不足平也景思
然之促奏行在天子乃以武皇爲雁門節度使

案新唐書表中

和二年以河東忻代二州隸雁門節度使大同節度爲
雁門節度治代州是中和二年以前雁門非鎮名也據
舊唐書初赦克用拜代州刺史忻代兵馬留後二年擢
雁門節度神策天寧軍鎮遏忻代觀察使是克用爲雁
門節度實在二仍令以本軍討賊新唐書王重榮傳重
年薛史疑誤與楊復光計復光曰我世與李克用共憂患其人忠不
顧難死義如已若乞師焉事蔑不濟乃遣使者約連和
李友金發五百騎齎詔召武皇于達靼武皇卽率達靼
諸部萬人趨雁門五月整兵二萬南向京師太原鄭從
謙以兵守石嶺關武皇乃引軍出他道至太原鄭從謙
以兵守石嶺雁門中和二年八月獻祖自達靼部率其
族歸代州十月武皇率忻代蔚朔達靼之軍三萬五千
騎赴難于京師先移檄太原鄭從謙拒關不納武皇以

兵擊之進軍至城下遣人齎幣馬遺從譙從譙亦遣人
饋武皇貨幣饗餼軍器武皇南去自陰地趨晉絳十二
月武皇至河中中和三年正月晉國公王鐸承制授武
皇東北面行營都統武皇令其弟克修領前鋒五百騎
渡河視賊黃巢遣將米重威齎重賂及僞詔以賜武皇
武皇納其賂以給諸將燔其僞詔是時諸道勤王之師
雲集京畿然以賊勢尙熾未敢爭鋒及武皇將至賊帥
相謂曰鴉兒軍至當避其鋒武皇以兵自夏陽濟河二
月營于乾坑店黃巢大將尙讓林言王璠趙璋等引軍
十五萬屯于梁田陂翌日大軍合戰自午及晡巢賊大

敗是夜賊眾遁據華州武皇進軍圍之巢弟黃鄴黃揆固守三月尙讓引大軍赴援武皇率兵萬餘逆戰于零口巢軍大敗武皇進軍渭橋翌日黃揆棄華州而遁王鐸承制授武皇雁門節度使檢校尙書左僕射四月黃巢燔長安收其餘眾東走藍關武皇進收京師七月天子授武皇金紫光祿大夫檢校左僕射河東節度使

案舊唐書

唐書僖宗紀五月制以雁門以北行營節度忻代蔚朔等州觀察處置等使檢校尙書左僕射代州刺史上柱國食邑七百戶李克用檢校司空同平章事兼太原尹北京留守充河東節度管内觀察處置等使新唐書沙陀傳云收京師功第一進同中書門下平章事隴西郡公未幾以克用領河東節度所載官爵與薛史詳略互異又武皇領河東薛史作七月是時武皇既收長安軍舊唐書作五月通鑑作薛史

勢甚雄諸侯之師皆畏之武皇一目微眇故其時號爲

獨眼龍是月武皇仗節赴鎮遣使報鄭從讜請治裝歸

朝武皇次于郊外因往赴雁門寧觀獻祖八月自雁門

赴鎮河東時年二十有八

案舊唐書八月李克用赴鎮太原制以前振武節度檢校

司空兼單于都護御史大夫李國昌爲檢校司徒代州

刺史雁門以北行營節度蔚朔等州觀察使薛史作七

月仗節赴鎮八月赴鎮河東蓋七月始離京師十一月

八月乃歸河東也通鑑統繫于七月似未詳考

平潞州表其弟克修爲昭義節度使

案通鑑克用表克修爲昭義軍節度

使在四年八月潞帥孟方立退保于邢州十二月許帥田

從異汴帥朱溫徐帥時溥陳州刺史趙犇各遣使來告

以巢蔡合從凶鋒尙熾請武皇共力討賊中和四年春

武皇率蕃漢之師五萬自澤潞將下天井關河陽節度

使諸葛爽辭以河橋不完乃屯兵于萬善數日移軍自

河中南渡趨汝洛

案舊唐書四年二月河東節度使李克用將出師援陳許河陽節度使諸

葛爽以兵屯澤州拒之三月甲戌克用移軍自河中南渡東下洛陽通鑑統作二月似未詳考四月武

皇合徐汴之師破尙讓于太康斬獲萬計進攻賊于西

華賊將黃鄴棄營而遁是夜大雨巢營中驚亂乃棄西

華之壘退營陳州北故陽里五月癸亥大雨震電平地

水深數尺賊營爲水所漂而潰戊辰武皇引軍營于中

牟大破賊于王滿渡庚午巢賊大至濟汴而北是夜復

大雨賊黨驚潰武皇營于鄭州賊眾分寇汴境武皇渡

汴遇賊將渡而南半濟擊之大敗之臨陣斬賊將李周
王濟安陽景彪等是夜賊大敗殘眾保于胙縣冤句大
軍躡之黃巢乃攜妻子兄弟千餘人東走武皇追賊至
于曹州是月班師過汴汴帥迎勞于封禪寺請武皇休
于府第乃以從官三百人及監軍使陳景思館于上源
驛是夜張樂陳宴席汴帥自佐饗出珍幣侑勸武皇酒
酣戲諸侍妓與汴帥握手敘破賊事以爲樂汴帥素忌
武皇案梁紀作克用乘醉任氣帝不平之通鑑從梁紀
今考新唐書沙陀傳亦作全忠忌克用桀邁難制
與唐紀合蓋全忠之攻上源驛實忌其威名乃與其將
而欲害之非徒以其乘醉任氣也宜從唐紀

楊彥洪密謀竊發彥洪于巷陌連車樹柵以扼奔竄之

路時武皇之從官皆醉俄而伏兵竊發來攻傳舍武皇
方大醉譟聲動地從官十餘人捍賊侍人郭景銖滅燭
扶武皇以茵幕裹之匿于牀下以水洒面徐曰汴帥謀
害司空武皇方張目而起引弓抗賊有頃煙火四合復
大雨震電武皇得從者薛鐵山賀回鶻等數人而去雨
水如澍不辨人物隨電光登尉氏門縋城而出得還本
營監軍陳景思大將史敬思並遇害武皇旣還營與劉
夫人相向慟哭詰旦欲勒軍攻汴夫人曰司空比爲國
家討賊赴東諸侯之急雖汴人謀害自有朝廷論列若
反戈攻城則曲在我也人得以爲辭乃收軍而去馳檄

于汴帥汴帥報曰竊發之夜非僕本心是朝廷遣天使
與牙將楊彥洪同謀也武皇自武牢關西趨蒲陝而旋
秋七月至太原武皇自以累立大功爲汴帥怨圖陷沒
諸將乃上章申理及武皇表至朝廷大恐遣內臣宣諭

尋加守太傅同平章事隴西郡王光啟元年三月幽州

李可舉鎮州王景崇

案新唐書沙陀傳作王景崇與薛史同舊唐書作王銘與薛史異考

藩鎮傳景崇以中和二年卒子銘繼立是光啟初連兵寇定州者當爲王銘非景崇也通鑑從舊唐書

寇定州節度使王處存求援于武皇武皇遣大將康君

立安老薛可郭曖率兵赴之五月鎮人攻無極武皇親

領兵救之鎮人退保新城武皇攻之斬首萬餘級獲馬

千匹王處存亦敗燕軍于易州十一月河中王重榮遣使來乞師且言邠州朱玫鳳翔李昌符將加兵于已初武皇與汴人構怨前後八表請削奪汴帥官爵自以本軍進討天子累遣內臣楊復恭宣旨令且全大體武皇不時奉詔天子頗右汴帥時觀軍容使田令孜君側擅權惡王重榮與武皇膠固將離其勢乃移重榮于定州重榮告于武皇武皇上章言李昌符朱玫挾邪忌正黨庇朱溫臣已點檢蕃漢軍五萬取來年渡河先斬朱玫李昌符然後平盪朱溫

新唐書王重榮傳詔克用將兵援河中重榮貽克用書且言奉

密詔須公到使我圖公此令孜朱全忠朱玫之惑上也因示僞詔克用方與全忠有隙信之請討全忠及玫

天子覽表遣使譬喻百端輅傳相望旣而朱玫引邠鳳
之師攻河中王重榮出師拒戰朱玫軍于沙苑對壘月
餘十二月武皇引軍渡河與朱玫決戰玫大敗收軍夜
遁入于京師時京城大駭天子幸鳳翔武皇退軍于河
中光啟二年正月僖宗駐蹕于寶雞武皇自河中遣使
上章請車駕還京且言大軍止誅凶黨時田令孜請僖
宗南幸興元武皇遂班師朱玫于鳳翔立嗣襄王煊爲
帝以僞詔賜武皇武皇燔之械其使馳檄諸方鎮遣來
使奉表于行在

案舊唐書僖宗紀楊復恭兄弟于河中
夫劉崇望賁詔宣諭達復恭之旨王重榮李克用欣然
聽命尋遣使貢奉獻縑十萬匹願殺朱玫自贖是克用

之奉僖宗因詔使宣諭而改圖也與薛史異新唐書沙陀傳云僞詔至太原克用燔之執其使問道奉表興元與薛史同歐陽史從九月武皇遣昭義節度使李克修舊唐書通鑑從薛史討孟方立于邢州大敗方立之眾于焦岡斬首數千級以大將安金俊爲邢州刺史以撫其降人十月進攻邢州邢人出戰又敗之孟方立求援于鎮州鎮人出兵三萬以援方立克修班師光啟三年六月河中節度使王重榮爲部將常行儒所殺武皇表重榮兄重盈爲帥七月武皇以安金俊爲澤州刺史時張全義自河陽據澤州及李罕之收復河陽召全義令守洛陽全義乃棄澤州而去故以金俊守之文德元年二月僖宗自興元還

京三月僖宗崩昭宗卽位以武皇爲開府儀同三司檢校太師兼侍中隴西郡王食邑七千戶食實封二百戶河南尹張全義潛兵夜襲李罕之于河陽城陷舉族爲全義所虜罕之踰垣獲免來歸于武皇遣李存孝薛阿檀史儼兒安金俊安休休將七千騎送罕之至河陽汴將丁會牛存節葛從周將兵赴援李存孝率精騎逆戰于溫縣汴人旣扼太行之路存孝殿軍而退騎將安休休以戰不利奔于蔡武皇以罕之爲澤州刺史遙領河陽節度使十月邢州孟方立遣大將奚忠信將兵三萬寇遼州武皇大破之斬首萬級生擒奚忠信龍紀元年

五月遣李罕之李存孝攻邢州六月下磁州邢將馬溉率兵數萬來拒戰罕之敗之于琉璃陂生擒馬溉拘于

城下孟方立恚恨飲酖而死三軍立其姪遷爲留後

舊案

唐書昭宗紀歐陽史莊宗紀皆以孟遷爲方立之弟新唐書孟方立傳作方立之子薛史武皇紀又作方立之姪未詳孰是使求援于汴汴將王虔裕率精甲數百入于邢

州罕之等班師大順元年遣李存孝攻邢州孟遷以邢洛磁三州降執汴將王虔裕三百人以獻武皇徙孟遷于太原以安金俊爲邢洛團練使三月昭義軍節度使李克修卒以李克恭爲潞州節度使是月武皇攻雲州拔其東城赫連鐸求援于燕燕帥李匡威將兵三萬以

赴之戰于城下燕軍大敗時徐州時溥爲汴軍所攻遣使來求援武皇命石君和由兗鄆以赴之五月潞州軍亂殺節度使李克恭州人推牙將安居受爲留後南結汴將時潞之小將馮霸擁叛徒三千騎駐于沁水居受使人召之馮霸不至居受懼出奔至長子爲村胥所殺傳首于霸霸遂入潞州自爲留後武皇遣大將康君立李存孝等攻之汴將朱崇節葛從周率兵入潞州以固之是時幽州李匡威雲州赫連鐸與汴帥協謀連上表請加兵于太原宰相張濬孔緯贊成其事六月天子削奪武皇官爵以張濬爲招討使以京兆尹孫揆爲副華

州韓建爲行營都虞候以汴帥爲河東南面招討使幽
州李匡威爲河東北面招討使雲州赫連鐸爲副汴將
朱友裕將兵屯晉絳時汴軍已據潞州又遣大將李謙
等率軍數萬急攻澤州武皇遣李存孝自潞州將三千
騎以援之汴將鄧季筠以一軍犯陣存孝追擊擒其都
將十數人獲馬千餘匹是夜李謙收軍而退大軍掩擊
至馬牢關斬首萬餘級追襲至懷州而還存孝復引軍
攻潞州八月存孝擒新授昭義節度使孫揆初朝廷授
揆節鉞以本軍取刀黃嶺路赴任存孝偵知之引騎三
百伏于長子縣崖谷間揆建牙持節褒衣大蓋擁眾而

行存孝突出谷口遂擒揆及中使韓歸範並將校五百人存孝械揆等以組練繫之環于潞州遂獻于武皇武皇謂揆曰公縉紳之士安言徐步可至達官何用如是揆無以對令繫于晉陽獄武皇將用爲副使使人誘之揆言不遜遂殺之九月汴將葛從周棄潞州而遁武皇以康君立爲潞州節度使以李存孝爲汾州刺史十月張濬之師入晉州遊軍至汾隰武皇遣薛鐵山李承嗣將騎三千出陰地關營于洪洞遣李存孝將兵五千營于趙城華州韓建以壯士三百人冒犯存孝之營存孝追擊直壓晉州西門張濬之師出戰爲存孝所敗自是

閉壁不出存孝引軍攻絳州十二月晉州刺史張行恭
棄城而奔韓建張濬由含山路遁去大順二年春正月
武皇上章申理其略曰臣今身無官爵名是罪人不敢
歸陛下藩方且欲于河中寄寓進退行止伏候聖裁天
子尋就加守中書令歐陽史復拜克用河東節度使隴
西郡王加檢校太師兼中書令
是月魏博爲汴將葛從周所寇節度使羅弘信遣使來
求援武皇出師以赴之三月邢州節度使安知建叛奔
青州天子以知建爲神武統軍自棣州泝河歸朝鄆州
朱瑄邀斬于河上傳首晉陽以李存孝爲邢州節度使
四月武皇大舉兵討赫連鐸于雲州遣騎將薛阿檀率

前軍以進攻武皇設伏兵于御河之上大破之因塹守其城七月武皇進軍柳會赫連鐸力屈食盡奔于吐渾部遂歸幽州雲州平武皇表石善友爲大同軍防禦使邢州節度使李存孝以鎮州王鎔託附汴人謀亂河朔北連燕寇請乘雲代之捷平定燕趙武皇然之八月大蒐于晉陽遂南巡澤潞略地懷孟河陽趙克裕望風送款請修鄰好九月蒐于邢州十月李存孝董前軍攻臨城鎮人五萬營于臨城西北龍尾崗武皇令李存審李存賢以步軍攻之鎮人大敗殺獲萬計拔臨城進攻元氏幽州李匡威以步騎五萬營于鄆邑以援鎮州武皇

舊五代史卷二十五
分兵大掠旋軍邢州

永樂大典卷一萬
八千一百五十五

舊五代史卷二十五終

舊五代史卷二十五攷證

唐武皇紀上中和三年薨 案新唐書沙陀傳作光啟

三年國昌卒與是書異

鎮州王景崇 王景崇舊唐書作王鎔考藩鎮傳景崇以中和二年卒子鎔繼立是光啟初寇定州者當爲王鎔也通鑑從舊唐書

光啟元年三月節度使王處存求援于武皇武皇遣大將康君立安老薛可郭噉率兵赴之五月鎮人攻無極武皇親領兵救之 案曲陽天安廟李克用題名碑云李克用以幽鎮侵擾中山領蕃漢步騎五十萬

親來救援時中和五年二月二十一日也至三月十七日以幽州請就和斷遂卻班師考舊唐書中和五年三月丙辰朔丁卯駕至京師己巳御宣正殿大赦改元是三月之十四日已改光啟曲陽去京師遠故未知耳又克用親援處存與通鑑遣將康君立異今考是書武皇先遣康君立等與通鑑合繼乃親領兵救之與題名碑台惟是書作五月碑作三月微有互異耳

乃移重榮于定州 案歐陽史作徙重榮于兗州考新唐書王重榮傳亦云令孜徙重榮兗海節度使與是

書異

武皇上章言李符朱玫挾邪忌正 李符歐陽史作李昌符蓋唐實錄避獻祖諱故去昌字

六月天子削奪武皇官爵 六月新唐書作五月

以張濬爲招討使 案新唐書本紀作張濬爲行營都招討宣慰使張濬傳作河東行營兵馬招討制置使歐陽史作太原四面行營兵馬都統

華州韓建爲行營都虞候 案歐陽史作韓建爲副使新唐書張濬傳作韓建爲供軍使

八月存孝擒新授昭義節度使孫揆 案新唐書作七

月戊申李克用執昭義節度使孫揆通鑑從是書作八月

張濬之師出戰爲存孝所敗 案新唐書帝紀作十一月張濬及李克用戰于陰地敗績歐陽史亦作十一月與是書先後互異

補前武天子復命元帥李涿 案歐陽史作招討使李補前武皇紀上涿通鑑亦作琢俱與是書異

補前武與薛葛安慶等部將 案新唐書作薩葛首領皇紀上

米海萬安慶

舊五代史卷二十五攷證

舊五代史卷二十六

宋司空同中書門下平章事薛居正等撰

武皇紀下

唐書二

景福元年正月鎮州王鎔恃燕人之援率兵十餘萬攻

邢州之堯山

案通鑑云景福元年正月王鎔李匡威合兵十餘萬攻堯山與薛史同舊唐書作大

順二年王鎔援邢州屯于堯山考此時邢州未叛于晉不得有王鎔之援師蓋卽景福元年事誤移于前一年

耳歐陽史從薛史

武皇遣李存信將兵應援李存孝素與存信

不協遞相猜貳留兵不進武皇又遣李嗣勳李存審將兵援之大破燕趙之眾斬首三萬收其軍實三月武皇進軍渡滹沱攻欒城下鼓城藁城四月燕軍寇雲代武

皇班師

案舊唐書云景福元年二月庚寅太原易定之兵合勢攻鎮州王鎔復告難于幽州李匡威率

步騎三萬

赴之時太原之眾軍于常山易定之眾堅守

固鎮燕趙

之卒分拒之三月克用處存斂軍而退是興

師以二月

至三月始旋師也通鑑云三月李克用王處

存合兵攻

王鎔癸丑拔天長鎮戊午鎔與戰于新市大

破之殺獲

三萬餘人辛酉克用退屯欒城是進師退師

皆在三月

也薛史作三月進軍四月班師與諸書異

八月赫連鐸誘幽州李匡威之眾八萬寇天威軍遂攻

雲州營于州北連亘數里武皇潛軍入于雲州詰旦出

騎軍以擊之斬獲數萬李匡威燒營而遁十月邢州李

存孝叛納款于梁李存信構之也

案舊唐書云大順元年十一月癸丑朔太

原將邢州刺史李存孝自恃擒孫揆功合為昭義帥怨

克用授康君立存孝自晉州率行營兵歸邢州據城上

表歸朝仍致書張濬王鎔求援今考薛史大順二年存

孝始為邢州節度無由于元年冬得據邢州也舊唐書

特因存孝攻澤潞而牽連書之其年月則誤耳新
唐書歐陽史通鑑並從薛史作景福元年十月

二年春大舉以伐王鎔以其通好于李存孝也二月攻
天長鎮旬日不下王鎔出師三萬來援武皇逆戰于叱
日嶺下鎮人敗斬首萬餘級時歲饑軍乏食脯屍肉而
食之進軍下井陘李存孝將兵夜入鎮州鎮人乞師于
汴汴帥方攻時溥不暇應之乃求援于幽州李匡威率
兵赴之武皇乃班師七月武皇討李存孝于邢州遂攻
平山渡潯水攻鎮州王鎔懼以帛五十萬犒軍請修舊
好仍以鎮冀之師助擊存孝許之武皇進圍邢州十月
武皇狩于近郊獲白兔有角長三寸乾寧元年三月邢

州李存孝出城首罪繫歸太原轅于市邢洺磁三州平

武皇表馬師素爲邢州節度使

案舊唐書作克用以大將馬師素權知邢洺團

練事與薛史異

五月鄆州節度使朱瑄爲汴軍所攻遣使來乞

師武皇遣騎將安福順安福應安福遷督精騎五百假

道于魏州以應之

案舊唐書云乾寧元年正月瑄瑾勢

史作五月與舊唐書異考朱瑄朱瑾自魚山之敗其勢始蹙當由正月遣使乞援至援師之出自在五月耳

九月潞州節度使康君立以酖死十月武皇自晉陽率

師伐幽州初李匡傳奪據兄位燕人多不義之安塞軍

戍將劉仁恭挈族歸于武皇武皇遇之甚厚仁恭數進

畫于蓋寓言幽州可取之狀願得兵一萬指期平定武

皇方討李存孝于邢州輟兵數千欲納仁恭不利而還

匡傳由是驕怠數犯邊境武皇怒故率軍以討之是時

雲州吐渾赫連鐸白義誠並來歸命皆笞而釋之

案舊唐書

昭宗紀六月壬辰克用攻陷雲州執赫連鐸新唐書昭

宗紀六月壬辰與李克用戰于雲州死之通鑑從新唐

書作李克用大破吐谷渾殺赫連鐸白義誠俱與薛

史異考雲州諸部因討李匡傳而來歸自當在十月而

諸書皆作六月十一月進攻武州甲寅

案甲寅字誤下文

月恐未足據十一月進攻武州甲寅

十二月有辛亥王

子甲寅則十一月不得有甲寅也據

通鑑考異蓋薛史仍紀年錄之誤

攻新州十二月李

匡傳命大將率步騎六萬救新州武皇選精兵逆戰燕

軍大敗斬首萬餘級生獲將領百餘人曳練狗于新州

城下是夜新州降辛亥攻媯州王子燕兵復合于居庸

關拒戰武皇命精騎以疲之令步將李存審由他道擊之自午至晡燕軍復敗甲寅李匡儔攜其族棄城而遁將之滄州隨行輜車臧獲妓妾甚眾滄帥盧彥威利其貨以兵攻匡儔于景城殺之盡虜其眾丙辰進軍幽州其守城大將請降武皇令李存審與劉仁恭入城撫勞居人如故市不改肆封府庫以迎武皇乾寧二年正月武皇在幽州命李存審劉仁恭徇諸屬郡二月以仁恭爲權幽州留後從燕人之請也案舊唐書元年十二月以李匡威故將劉仁恭爲幽州兵馬留後歐陽史亦作元年冬事皆因平幽州而終言之未嘗註其年月也通鑑從薛史作二年二月留腹心燕留德等十餘人分典軍政武皇遂班師凡駐

幽州四十日六月武皇率蕃漢之師自晉陽趨三輔討
鳳翔李茂貞邠州王行瑜華州韓建之亂先是三帥稱
兵向闕同弱王室殺害宰輔時河中節度使王重盈卒
重榮之子珂卽武皇之子壻也權典軍政其兄珙爲陝
州節度使瑤爲絳州刺史與珂爭河中遂訴于岐邠華
三鎮言珂本蒼頭不當襲位珂亦訴于武皇武皇上表
保薦珂乞授河中旄鉞詔可之三帥遂以兵入覲大掠
京師請授王珂同州節度使王瑤河東節度使天子亦
許之武皇遂舉兵表三帥之罪復移檄三鎮三鎮大懼
是月次絳州刺史王瑤登陴拒命武皇攻之旬日而拔

斬王瑤于軍門誅其黨千餘人七月次河中王珂迎謁于路己未同州節度使王行約棄城奔京師與左軍兵士劫掠西市都民大擾行約卽行瑜弟也庚申樞密使駱全瓘以武皇之軍將至請天子幸右軍指揮使李繼鵬茂貞假子也本姓閭名珪與全瓘謀劫天子幸鳳翔左軍指揮使王行實亦行瑜之弟也與劉景宣欲劫天子幸邠州兩軍相攻縱火燒內門煙火蔽天天子急詔鹽州六都兵士令追殺亂兵左右軍退走王行瑜李茂貞聲言自來迎駕天子懼出幸南山駐驛于莎城是夜熒惑犯心壬戌武皇進取同州聞天子幸石門遣判官

王瓌奉表奔問天子遣使賜詔令與王珂同討邠鳳時

武皇方攻華州俄聞李茂貞領兵士三萬至鰲厓王行

瑜領兵至興平欲往石門迎駕乃解華州之圍進營渭

橋天子遣延王戒丕丹王允齋詔促武皇兵直抵邠鳳

八月乙酉供奉官張承業齋詔告諭

案舊唐書七月丁卯上遣內官張承

業傳詔克用軍便令監太原行營兵馬發赴新平薛史

作八月乙酉與舊唐書月日互異相隔久遠舊唐書又

作八月乙酉朔延王至河中疑承業與延王同行據通鑑

鑑作壬午遣張承業詣克用軍蓋壬午遣使己酉始至

耳涇帥張鐔已領步騎三萬于京西北扼邠岐之路武
皇進營渭北遣史儼將三千騎往石門扈駕遣李存信
李存審會邠延之兵攻行瑜之梨園寨天子削奪行瑜

官爵以武皇爲天下兵馬都招討使以鄜州李思孝爲
北面招討使以涇州張鑑爲西南面招討使天子又遣
延王丹王賜武皇御衣及大將茶酒弓矢命二王兄事
武皇延王傳天子密旨云日昨非卿至此已爲賊庭行
酒之人矣所慮者二凶締合卒難翦除且欲姑息茂貞
令與卿修好俟梟斬行瑜更與卿商量武皇上表請駕
還京案舊唐書作王寅李克用遣子存貞奉表行在請車駕還京考當時奉表者卽後唐莊宗也莊宗未嘗名存貞舊唐書誤令李存節領二千騎于京西北以防邠賊奔
突辛亥天子還宮加武皇守太師中書令邠寧四面行
營都統時王行瑜弟兄固守梨園寨我師攻之甚急李

茂貞遣兵萬餘來援行瑜營于龍泉鎮茂貞自率兵三萬迫延陽武皇奏請詔茂貞罷兵兼請削奪茂貞官爵詔曰茂貞勒兵蓋備非常尋已發遣歸鎮又言茂貞已誅李繼鵬李繼畧卿可切戒兵甲無犯土疆武皇請賜河中王珂旌節三表許之又表李罕之爲副都統十月丙戌李存信于梨園寨北遇賊軍斬首千餘級自是賊閉壁不出戊子天子賜武皇內弟子四人又降朱書御札賜魏國夫人陳氏是月王行瑜因敗衄之後閉壁自固武皇令李罕之晝夜急攻賊軍乏食拔營而去李存信與罕之等先伏軍于阨路俟賊軍之至縱兵擊之殺

戮萬計是日收梨園等三寨生擒行瑜之子知進並母
丘氏大將李元福等二百人送赴闕庭庚寅王行納王
行實燒劫寧州遁走寧州守將徐景乞降武皇表蘇文
建爲邠州節度使且于寧州爲治所十一月丁巳案舊唐書
作十一月癸未朔疑十一月不當有丁巳據薛史上文
十月有丙戌戊子則十一月斷非癸未朔矣通鑑所定
月日皆從薛史收龍泉寨時行瑜以精甲五千守之李茂貞出
兵來援爲李罕之所敗邠賊遂棄龍泉寨而去行瑜復
入邠州大軍進逼其城行瑜登城號哭曰行瑜無罪昨
殺南北司大臣是岐帥將兵脅制主上請治岐州行瑜
乞束身歸朝武皇報曰王尙父何恭之甚耶僕受命討

三賊臣公其一也如能束身歸闕老夫未敢專命爲公
奏取進止行瑜懼棄城而遁武皇收其城封府庫遽以
捷聞旣而慶州奏王行瑜將家屬五百人到州界爲部

下所殺傳首闕下武皇旣平行瑜還軍渭北十二月武

皇營于雲陽

案歐陽史晉軍渭北遇雨六十日考通鑑十二月乙酉李克用軍于雲陽辛亥引兵

東歸無緣得有六
十日也歐陽史誤

侯討鳳翔進止乙未天子賜武皇爲

忠貞平難功臣進封晉王加實封二百戶武皇復上表
請討李茂貞天子不允武皇私謂詔使曰觀主上意疑
僕別有他腸復何言哉但禍不去胎憂患未已又奏臣
統領大軍不敢徑赴朝覲遂班師乾寧三年正月汴人

大舉以攻克鄆朱瑄朱瑾再乞師于武皇假道于魏州
羅弘信許之乃令都指揮使李存信將步騎三萬與李
承嗣史儼會軍以拒汴人存信軍于莘與朱瑾合勢頻
挫汴軍汴帥患之乃間魏人存信御兵無法稍侵魏之
芻牧者弘信乃與汴帥通出師三萬攻存信軍存信揭
營而退保于洺州三月武皇大掠相魏諸邑攻李固洹
水殺魏兵萬餘人進攻魏州案舊唐書六月庚戌李克
用率沙陀并汾之眾五萬
攻魏州及其郛大掠于其六郡陷成安洹水臨漳十餘
邑報莘之怒也薛史作三月事蓋自三月興師至十月
始退耳五月汴將葛從周氏叔琮引兵赴援六月李茂貞
舉兵犯京師七月車駕幸華州是月武皇與汴軍戰于

涇水之上鐵林指揮使落落被擒落落武皇之長子也
旣戰馬蹕于坎武皇馳騎以救之其馬亦蹕汴之追兵
將及武皇背射一發而斃乃退九月李存信攻魏之臨
清汴將葛從周等引軍來援大敗于宗城北存信進攻
魏州十月武皇敗魏軍于白龍潭追擊至觀音門汴軍
救至乃退十一月武皇徵兵于幽鎮定三州將迎駕于
華下幽州劉仁恭託以契丹入寇俟敵退聽命乾寧四
年正月汴軍陷兗鄆騎將李承嗣史儼與朱瑾同奔于
淮南三月陝帥王珙攻河中王珂來告難武皇遣李嗣
昭率二千騎赴之破陝軍于猗氏乃解河中之圍至是

天子遣延王戒不至晉陽傳宣旨于武皇朕不取卿言
以及于此苟非英賢竭力朕何由再謁廟庭在卿表率
予所望也七月武皇復徵兵于幽州劉仁恭辭旨不遜
武皇以書讓之仁恭捧書謾罵抵之于地仍囚武皇之
行人八月大舉以伐仁恭九月師次蔚州戊寅晨霧晦
暝占者云不利深入辛巳攻安塞俄報燕將單可及領
騎軍至矣武皇方置酒高會前鋒又報賊至矣武皇曰
仁恭何在曰但見可及輩武皇張目怒曰可及輩何足
爲敵仍促令出師燕軍已擊武皇軍寨武皇乘醉擊賊
燕軍披靡時步兵望賊而退爲燕軍所乘大敗于木瓜

澗俄而大風雨震電燕軍解去武皇方醒甲午師次代
州劉仁恭遣使謝罪于武皇武皇亦以書報之自此有
檄十餘返光化元年春正月鳳翔李茂貞華州韓建皆
致書于武皇乞修和好同獎王室兼乞助丁匠修繕秦
宮武皇許之四月汴將葛從周寇邢洺磁等州旬日之
內三州連陷汴人以葛從周爲邢州節度使大將李存
信收軍自馬嶺而旋八月壬戌天子自華還宮是時車
駕初復而欲諸侯輯睦賜武皇詔令與汴帥通好武皇
不欲先下汴帥乃致書于鎮州王鎔令導其意明年汴
帥遣使奉書幣來修好武皇亦報之自是使車交馳朝

野相賀九月武皇遣周德威李嗣昭率兵三萬出青山口以迫邢洺十月遇汴將葛從周于張公橋旣戰我軍大敗是月河中王珂來告急言王珙引汴軍來寇武皇遣李嗣昭將兵三千以援之屯于胡壁堡汴軍萬餘人來拒戰嗣昭擊退之十二月潞州節度使薛志勤卒澤州刺史李罕之以本軍夜入據城以叛罕之報武皇曰薛鐵山新死潞民無主慮軍城有變輒專命鎮撫武皇令人讓之罕之乃歸于汴武皇遣李嗣昭將兵討之下澤州收罕之家屬拘送晉陽光化二年春正月李罕之陷沁州三月汴將葛從周氏叔琮自土門陷承天軍又

陷遼州進軍榆次武皇令周德威擊之敗汴軍于洞渦
驛叔琮棄營而遁德威追擊出石會關殺千餘人汴人
復陷澤州五月武皇令都指揮使李君慶將兵收澤潞
爲汴軍所敗而還以李嗣昭爲都指揮使進攻潞州八
月嗣昭營于潞州城下前鋒下澤州時汴將賀德倫張
歸厚等守潞州是月德倫等棄城而遁潞州平九月武
皇表汾州刺史孟遷爲潞州節度使光化三年汴軍大
寇河朔幽州劉仁恭乞師武皇遣周德威帥五千騎以
援之七月李嗣昭攻堯山至內丘敗汴軍于沙河進攻
洺州下之九月汴帥自將兵三萬圍洺州嗣昭棄城而

歸葛從周設伏于青山口嗣昭之軍不利十月汴人乘勝寇鎮定鎮定懼皆納賂于汴是時周德威與燕軍劉守光敗汴人二萬于望都聞定州王郃來奔乃班師是月天子加武皇實封一百戶遣李嗣昭率步騎三萬攻懷州下之進攻河陽汴將閻寶率軍來援嗣昭退保懷州天復元年正月汴將張存敬攻陷晉絳二州以兵二萬屯絳州以扼援路二月張存敬迫河中王珂告急于武皇使者相望于路珂妻邠國夫人武皇愛女也亦以書至懇切求援武皇報曰賊阻道路眾寡不敵救爾卽與爾兩亡可與王郃棄城歸朝珂遂送款于張存敬三

月汴帥自大梁至河中王珂遂出迎尋徙于汴天子以
汴帥兼鎮河中武皇自是不復能援京師霸業由是中
否四月汴將氏叔琮率兵五萬自太行路寇澤潞魏博
大將張文恭領軍自新口入葛從周領兗鄆之眾自土
門入張歸厚以邢洺之眾自馬嶺入定州王處直之眾
自飛狐入侯言以晉絳之兵自陰地入氏叔琮康懷英
營于澤州之昂車武皇令李嗣昭將三千騎赴澤州援
李存璋而歸賀德倫氏叔琮軍至潞州孟遷開門迎沁
州刺史蔡訓亦以城降于汴氏叔琮悉其眾趨石會關
是時偏將李審建先統兵三千在潞州亦與孟遷降于

汴及叔琮之入寇也審建爲其鄉導汴人營于洞渦別將白奉國與鎮州大將石公立自井陘入陷承天軍及攻壽陽遼州刺史張鄂以城降于汴都人大恐時霖雨積旬汴軍屯聚旣眾芻糧不給復多痢瘡師人多死時大將李嗣昭李嗣源每夜率驍騎突營掩殺敵眾恐懼五月汴軍皆退氏叔琮軍出石會周德威李嗣昭以精騎五千躡之殺戮萬計初汴軍之將入寇也汾州刺史李瑋據城叛以連汴人至是武皇令李嗣昭李存審將兵討之是歲并汾饑粟暴貴人多附瑋爲亂嗣昭悉力攻城三日而拔擒李瑋等斬于晉陽市氏叔琮旣旋軍

過潞州虜孟遷以歸汴帥以丁會爲潞州節度使六月
遣李嗣昭周德威將兵出陰地攻慈隰二郡隰州刺史
唐禮慈州刺史張瓊並以城來降武皇以汴寇方盛難
以兵服佯降心以緩其謀乃遣牙將張特持幣馬書檄
以諭之陳當時利害請復舊好十一月壬子汴帥營于
渭濱甲寅天子出幸鳳翔新唐書帝如鳳翔李茂貞韓
全誨請召克用入衛克用間
道遣使者奔問並詰書武皇遣李嗣昭率兵三千自沁
全忠勸還汴全忠不答州趨平陽遇汴軍于晉州北斬首五百級天復二年二
月李嗣昭周德威領大軍自慈隰進攻晉絳營于蒲縣
乙未汴將朱友寧氏叔琮將兵十萬營于蒲縣之南乙

已汴帥自領軍至晉州德威之軍大恐三月丁巳有虹貫德威之營戊午氏叔琮率軍來戰德威逆擊爲汴人所敗兵仗輜重委棄殆盡朱友寧長驅至汾州慈隰二州復爲汴人所據辛酉汴軍營于晉陽之西北攻城西門周德威李嗣昭緣山保其餘眾而旋武皇驅丁壯登陣拒守汴軍攻城日急武皇召李嗣昭周德威等謀將出奔雲州嗣昭以爲不可李存信堅請且入北蕃續圖進取嗣昭等固爭之太妃劉氏亦極言于內乃止居數日亡散之士復集軍城稍安李嗣昭與李嗣源夜入汴軍斬將搴旗敵人扞禦不暇自相驚擾丁卯朱友寧燒

營而遁周德威追至白壁關俘斬萬計因收復慈隰汾等三州天復三年正月天子自鳳翔歸京五月雲州都將王敬暉殺刺史劉再立以城歸于劉仁恭武皇遣李嗣昭討之仁恭遣將以兵五萬來援雲州嗣昭退保樂安燕人虜敬暉棄城而去武皇怒笞嗣昭及李存審而削其官是時親軍萬眾皆邊部人動違紀律人甚苦之左右或以爲言武皇曰此輩膽略過人數十年從吾征伐比年以來國藏空竭諸軍之家賣馬自給今四方諸侯皆懸重賞以募勇士吾若束之以法急則棄吾吾安能獨保此乎俟時開運泰吾固自能處置矣天祐元年

閏四月汴帥迫天子遷都于洛陽

新唐書帝東遷詔至太原克用位謂其下

曰乘輿不復西矣遣使者奔問行在

五月乙丑天子制授武皇叶盟同力

功臣加食邑三千戶實封三百戶八月汴帥遣朱友恭

弒昭宗于洛陽宮輝王卽位告哀使至晉陽武皇南向

慟哭三軍縞素天祐二年春契丹安巴堅

舊作阿保始機今改正

盛武皇召之安巴堅領部族三十萬至雲州與武皇會

于雲州之東握手甚歡結爲兄弟旬日而去留馬千匹

牛羊萬計

案東都事略契丹與晉王會在天祐三年遼史太祖紀與薛史同

期以冬初

大舉渡河天祐三年正月魏博旣殺牙軍魏將史仁遇

據高唐以叛遣人乞師于武皇武皇遣李嗣昭率三千

騎攻邢州以應之遇汴將牛存節張筠于青山口嗣昭不利而還九月汴帥親率兵攻滄州幽州劉仁恭遣使來乞師武皇乃徵兵于仁恭將攻潞州以解滄州之圍仁恭遣掌書記馬郁都指揮使李博等將兵三萬會于晉陽武皇遣周德威李嗣昭合燕軍以攻澤潞十二月潞州節度使丁會開門迎降命李嗣昭爲潞州節度使以丁會歸于晉陽天祐四年正月甲申汴帥聞潞州失守自滄州燒營而遁四月天子禪位于汴帥奉天子爲濟陰王改元爲開平國號大梁是歲四川王建遣使至勸武皇各王一方俟破賊之後訪唐朝宗室以嗣帝位

然後各歸藩守武皇不從以書報之曰竊念本朝屯否
巨業淪胥攀鼎駕以長違撫彤弓而自咎默默終古悠
悠彼蒼生此厲階永爲痛毒視橫流而莫救徒誓楫以
興言別捧函題過垂獎諭省覽周旣駭惕異常淚下霑
衿倍鬱申胥之素汗流浹背如聞蔣濟之言僕經事兩
朝受恩三代位叨將相籍係宗枝賜鐵鉞以專征徵苞
茅而問罪塵兵校戰二十餘年竟未能斬新莽之頭顱
斷蚩尤之肩髀以至廟朝顛覆豺虎縱橫且授任分憂
叨策冒寵龜玉毀櫝誰之咎歟俯閱指陳不勝慚慙然
則君臣無常位陵谷有變遷或箠塞長河泥封函谷時

移事改理有萬殊卽如周末虎爭魏初鼎據孫權父子
不顯授于漢恩劉備君臣自微興于涿郡得之不謝于
家世失之無損于功名適當逐鹿之秋何惜華蟲之服
唯僕累朝席寵奕世輸忠忝佩訓詞粗存家法善博奕
者唯先守道治蹊田者不可奪牛誓于此生靡敢失節
仰憑廟勝早殄寇讎如其事與願違則共臧洪遊于地
下亦無恨矣唯公社稷元勳嵩衡降祉鎮九州之上地
負一代之弘才合于此時自求多福所承良訊非僕深
心天下其謂我何有國非吾節也悽悽孤懇此不盡陳
五月梁祖遣其將康懷英率兵十萬圍潞州懷英驅率

士眾築壘環城城中音信斷絕武皇遣周德威將兵赴援德威軍于余吾率先鋒挑戰日有俘獲懷英不敢卽戰梁祖以懷英無功乃以李思安代之思安引軍將營于潞城周德威以五千騎搏之梁軍大敗斬首千餘級思安退保堅壁別築外壘謂之夾寨以抗我之援軍梁祖調發山東之民以供饋運德威日以輕騎掩之運路艱阻眾心益恐李思安乃自東南山口築夾道連接夾寨以通饋運自是梁軍堅保夾寨冬十月武皇有疾是時晉陽城無故目壞占者惡之天祐五年正月戊子朔武皇疾革辛卯崩于晉陽年五十三遺令薄葬發喪後

二十七日除服莊宗卽位追諡武皇帝廟號太祖陵在

雁門

永樂大典卷七千一百五十四五代史補太祖

窠中酋長以其異生諸族傳養之遂以諸爺爲氏言非

一父所養也其後言訛以諸爲朱以爺爲耶至太祖生

眇一部落所疾太祖恐禍及遂舉族歸唐授雲州刺史賜

爲部名克用黃巢犯長安自北引兵赴難功成遂拜太

姓李名克用黃巢犯長安自北引兵赴難功成遂拜太

原節度使封晉王武皇之有河東也威聲大振淮南太

楊行密常恨不識其狀貌因使畫工詐爲商賈往河東

寫之畫工到未幾人有知其謀者擒之武皇初甚怒旣

而親謂曰且吾素眇一試召之使寫觀其所爲如何

及至武皇按膝厲聲曰淮南使汝來寫吾眞必畫工之

尤也寫吾不及十分卽階下便是死汝之所矣畫工再

拜下筆時方盛暑武皇執八角扇因寫扇角半遮其面

武皇曰汝諂吾也遽使別寫之又應聲下筆畫其臂弓

撚箭之狀仍微合一目以觀箭之曲直武皇大喜因厚

賂金帛遣之五代史闕文世傳武皇臨薨以三矢付

莊宗曰一矢討劉仁恭汝不先下幽州河南未可圖也

一矢擊契丹且曰安巴堅與吾把臂而盟結爲兄弟誓復唐家社稷今背約附賊汝必伐之一矢滅朱溫汝能成吾志死無憾矣莊宗藏三矢于武皇廟庭及討劉仁恭命幕吏以少牢告廟請一矢盛以錦囊使親將負之以爲前驅凱旋之日隨俘馘納矢于太廟伐契丹滅朱氏亦如之又武皇眇一目謂之獨眼龍性喜殺左右有卽過失必寘于死初諱眇人無敢犯者嘗令寫眞畫工厚爲撚箭之狀微瞑一目圖成而進武皇大悅賜予甚

史臣曰武皇肇跡陰山赴難唐室逐豺狼于魏闕殄氛禳于秦川賜姓受封奄有汾晉可謂有功矣然雖茂勤王之績而非無震主之威及朱鎮屯渭曲之師俾翠輦有石門之幸比夫桓文之輔周室無乃有所愧乎洎失援于蒲絳久垂翅于并汾若非嗣子之英才豈有興王

之茂業矧累功積德未比于周文創業開基尙虧于魏
祖追諡爲武斯亦幸焉

永樂大典卷七
千一百五十四

舊五代史卷二十六終

舊五代史卷二十六攷證

三月武皇進軍渡滹沱攻欒城下鼓城橐城四月燕軍
寇雲代武皇班師 案舊唐書作景福元年二月庚
寅太原易定之兵合勢攻鎮州三月克用處存斂軍
而退是興師以二月至三月始旋師也通鑑云三月
克用王處存合兵攻王鎔癸丑拔天長鎮戊午鎔與
戰於新市大破之辛酉克用退屯欒城是進師退師
皆在三月也是書作三月進軍四月班師與諸書異
天祐二年春契丹安巴堅領部族三十萬至雲州與武
皇會於雲州之東 案武皇會契丹於雲州通鑑作

開平元年新唐書作天祐元年與是書異歐陽史與是書同又契丹國志作晉王李存勗與契丹連和會於東城殊誤

梁祖以懷英無功乃以李思安代之案李思安之代懷英通鑑作七月事與是書繫五月異

舊五代史卷二十六攷證

舊五代史卷二十七

宋司空同中書門下平章事薛居正等撰

莊宗紀第一

唐書三

莊宗光聖神閔孝皇帝諱存勗武皇帝之長子也母曰貞簡皇后曹氏以唐光啟元年歲在乙巳冬十月二十
二日癸亥生帝于晉陽宮姪時曹后嘗夢神人黑衣擁
扇夾侍左右載誕之辰紫氣出于牕戶及爲嬰兒體貌
奇特沉厚不羣武皇特所鍾愛及武皇之討王行瑜帝
時年十一從行初令人覲獻捷迎駕還宮昭宗一見駭
之曰此兒有奇表因撫其背曰兒將來之國棟也勿忘

忠孝于予家因賜鵝鵝酒卮翡翠盤

案北夢瑣言云昭宗曰此子可亞其

父時人號曰亞子

賊平授檢校司空隰州刺史改汾晉二郡皆

遙領之帝洞曉音律常令歌舞于前十三習春秋手自
繕寫畧通大義及壯便射騎膽畧絕人其心豁如也武
皇起義雲中部下皆北邊勁兵及破賊迎鑾功居第一
由是稍優寵士伍因多不法或陵侮官吏豪奪士民白
晝剽攘酒博喧競武皇緩于禁制唯帝不平之因從容
啟于武皇武皇依違之及安塞不利之後時事多難梁
將氏叔琮康懷英頻犯郊圻土疆日蹙城門之外鞠爲
戰場武皇憂形于色帝因啟曰夫盛衰有常理禍福繫

神道家世三代盡忠王室勢窮力屈無所愧心物不極則不反惡不極則不亡今朱氏攻逼乘輿窺伺神器陷害良善誣誑神祇以臣觀之殆其極矣大人當遵養時晦以待其衰何事輕爲沮喪太祖釋然因奉觴作樂而罷及滄州劉守文爲梁朝所攻其父仁恭遣使乞師武皇恨其翻覆不時許之帝白曰此吾復振之道也不得以嫌怨介懷且九分天下朱氏今有六七趙魏中山在佗庶下賊所憚者唯我與仁恭爾我之興衰繫此一舉不可失也太祖乃徵兵于燕攻取潞州旣而丁會果以城來降天祐五年春正月武皇疾篤召監軍張承業大

將吳琪謂曰吾常愛此子志氣遠大可付後事唯卿等
所教及武皇猷代帝乃嗣王位于晉陽時二十有四汴
人方寇潞州周德威宿兵於亂柳以軍城易帥竊議惻
惻訛言播于行路帝方居喪將吏不得謁見監軍使張
承業排闥至廬所言曰夫孝在不墜家業不同匹夫之
孝且君父厭世嗣主未立竊慮兇猾不逞之徒有懷覬
望又汴寇壓境利我凶衰苟或搖動則倍張賊勢訛言
不息懼有變生請依顧命墨纁聽政保家安親此惟大
孝帝于是始聽斷大事時振武節度使克寧卽帝之季
父也爲管内蕃漢馬步都知兵馬使典握兵柄帝以軍

府事讓季父曰兒年幼稚未通庶政雖承遺命恐未能
彈壓季父勲德俱高眾情推伏且請制置軍府俟兒有
立聽季父處分克寧曰亡兄遺命屬在我兒孰敢異議
因率先拜賀初武皇獎勵戎功多畜庶孽衣服禮秩如
嫡者六七輩比之嗣王年齒又長部下各縮強兵朝夕
聚議欲謀爲亂及帝紹統或強項不拜鬱鬱憤惋託疾
廢事會李存顥以陰計干克寧曰兄亡弟立古今舊事
季父拜姪理所未安克寧妻素剛狠因激怒克寧陰圖
禍亂存顥欲于克寧之第謀害張承業李存璋等以并
汾九州歸附于梁送貞簡太后爲質克寧意將激發乃

擅殺大將李存質請授已雲州節度使割蔚朔應三州
爲屬郡帝悉俞允然知其陰禍有日矣克寧俟帝過其
第則圖竊發時幸臣史敬鎔者亦爲克寧所誘盡得其
情乃來告帝帝謂張承業曰季父所爲如此無猶子之
情骨肉不可自相魚肉予當避路則禍亂不作矣承業
曰臣受命先帝言猶在耳存顥輩欲以太原降賊王欲
何路求生不卽誅除亡無日矣因召吳珙李存璋李存
敬朱守殷諭其謀眾咸憤怒二月壬戌命存璋伏甲以
誅克寧遂靖其難是月唐少帝崩于曹州梁祖使人酖
之也帝聞之舉哀號慟三月周德威尙在亂柳梁將李

思安屢爲德威所敗閉壁不出是時梁祖自將兵至澤州以劉知俊爲招討使以代思安以范君實劉重霸爲先鋒牛存節爲撫遏統大軍營于長子四月帝召德威軍歸晉陽汴人旣見班師知我國禍以爲潞州必取援軍無俟再舉遂停斥候梁祖亦自澤州歸洛帝知其無備乃謂將曰汴人聞我有喪必謂不能興師又以我少年嗣位未習戎事必有驕怠之心若簡練兵甲倍道兼行出其不意以吾憤激之眾擊彼驕惰之師拉朽摧枯未云其易解圍定霸在此一役甲子軍發自太原己巳至潞州北黃碾所營五月辛未朔晨霧晦暝帝率親軍

伏三垂崗下詰旦天復昏霧進軍直抵夾城時李嗣源總帳下親軍攻東北隅李存璋王霸率丁夫燒寨斷夾城爲二道周德威李存審各分道進攻軍士鼓譟三道齊進李嗣源壞夾城東北隅率先掩擊梁軍大恐南向而奔投戈委甲噎塞行路斬萬餘級獲其將副招討使符道昭洎大將三百人芻粟百萬梁招討使康懷英得百餘騎出天井關而遁梁祖聞其敗也旣懼而歎曰生子當如是李氏不亡矣吾家諸子乃豚犬爾初唐龍紀元年帝纔五歲從武皇校獵于三垂崗崗上有玄宗原廟在焉武皇于祠前置酒樂作伶人奏百年歌者陳其

衰老之狀聲調悽苦武皇引滿捋鬚指帝曰老夫壯心未已二十年後此子必戰于此及是役也果符其言焉是月周德威乘勝攻澤州刺史王班登城拒守梁將劉知俊自晉絳將兵赴援德威退保高平帝遂班師于晉陽告廟飲至賞勞有差乃下令于國中禁賊盜恤孤寡徵隱逸止貪暴峻隄防寬獄訟朞月之間其俗丕變帝每出于路遇饑寒者必駐馬而臨問之由是人情大悅王霸之業自茲而基矣六月鳳翔李茂貞邠州楊崇本合西川王建之師五萬以攻長安遣使會兵于帝帝遣張承業率師赴之九月邠岐蜀三鎮復大舉攻長安遣

李嗣昭周德威將兵三萬攻晉州以應之德威與梁將

尹皓戰于神山北梁人大敗是時晉之騎將夏侯敬受

以一軍奔于梁德威乃退保隰州

案歐陽史九月丁丑如懷州通鑑作周德

威等聞梁帝將至乙未退保隰州是德威之退師因梁祖之親至也薛史唐紀不載天祐六年秋

七月邠岐二帥及梁之叛將劉知俊俱遣使來告將大

舉以伐靈夏兼收關輔請出兵晉絳以張兵勢八月帝

御軍南征先遣周德威李存審丁會統大軍出陰地關

攻晉州爲地道壞城二十餘步城中血戰拒守梁祖遣

楊師厚領兵赴援德威乃收軍而退

通鑑引莊宗實錄云汴軍至蒙院周

德威逆戰敗之斬首三百級師厚退保絳州是役也天

小將蕭萬通戰歿師厚進營平陽德威收軍而退

祐七年秋七月鳳翔李茂貞邠州楊崇本皆遣使來會
兵同討靈夏且言劉知俊三敗汴軍于寧州靈夏危蹙
岐隴之師大舉決取河西帝令周德威將兵萬人西渡
河以應之是役也劉知俊爲岐人所構乃自退九月德
威班師冬十月梁祖遣大將李思安楊師厚率師營于
澤州以攻上黨十一月鎮州王鎔遣使來求援是時梁
祖以羅紹威初卒全有魏博之地因欲兼并鎮定遣供
奉官杜廷隱丁延徽督魏軍三千人入于深冀鎮人懼
故來告難帝集軍吏議之咸欲按甲治兵徐觀勝負唯
帝獨斷堅欲救之乃遣周德威率軍屯于趙州是月行

營都招討使丁會卒十二月丁巳朔梁祖聞帝軍屯趙州命寧國軍節度使王景仁爲北面行營招討使韓勅爲副相州刺史李思安爲前鋒會魏州之兵以討王鎔又令閭寶王彥章率二千騎會景仁于邢洛丁丑景仁營于栢鄉帝遂親征自贊皇縣東下辛巳至趙州與周德威兵合帝令史建瑭以輕騎嘗寇獲芻牧者二百人問其兵數精兵七萬是日帝觀兵于石橋南詰旦進軍距栢鄉一舍周德威史建瑭率蕃落勁騎以挑戰四面馳射梁軍閉壁不出乃退翌日進軍距栢鄉五里遣騎軍逼其營梁將韓勅李思安率步騎三萬鎧甲炫曜其

勢甚盛分道以薄帝軍德威且戰且退距河而止旣而德威偵知梁人造浮橋乃退保高邑乙酉致師于栢鄉帝禱戰于光武廟栢鄉無芻粟之備梁軍以樵采爲給爲帝之游軍所獲由是堅壁不出剉屋茅坐席以秣其馬眾心益恐天祐八年正月丁亥周德威史建瑭帥三千騎致師于栢鄉設伏于村塢間遣三百騎直壓其營梁將怒悉其軍結陣而來德威與之轉戰至高邑南梁軍列陣橫亘六七里時帝軍未成列李存璋引諸軍陣于野河之上梁軍以五百人爭橋鎮定之師與血戰梁軍敗而復整者數四帝與張承業登高觀望梁人戈矛

如束申令之後，蹕聲若雷。王師進退有序，步騎嚴整，寂然無聲。帝臨陣誓眾人，百其勇，短兵既接，無不奮力。梁有龍驤神威、拱宸等軍，皆武勇之士也。每一人鎧仗費數十萬，裝以組繡，飾以金銀，人望而畏之。自己及午，騎軍接戰，至晡，梁軍欲抽退，塵埃漲天，德威周麾，而呼曰：「汴人走矣！」帝軍齊譟以進，魏人收軍漸退。李嗣源率親軍與史建瑭、安金全兼北部吐渾諸軍衝陣夾攻，梁軍大敗，棄鎧投仗之聲震動天地。龍驤神威神捷諸軍殺戮殆盡，自陣至栢鄉數十里，殭屍枕籍，敗旗折戟所在蔽地。夜漏一鼓，帝軍入栢鄉，梁軍輜重、帳幄、資財、奴僕

皆爲帝軍所有梁將王景仁韓勅李思安等以數十騎
夜遁是役也斬首二萬級獲馬三千匹鎧甲兵仗七萬
輜車鍋幕不可勝計擒梁將陳思權以下二百八十五
人帝號令收軍于趙州旣而梁人棄深冀二州而遁初
杜廷隱之襲深冀也聲言分兵就食時王鎔將石公立
戍深州欲杜關不納鎔遽令啟關命公立移軍于外廷
隱遂據其城公立旣出指城闔而言曰開門納盜後悔
何追此城數萬生靈生爲俘馘矣因投刃泣下數日廷
隱閉城殺鎮兵數千人遂登陴扼守王鎔方命公立攻
之卽有備矣及栢鄉之敗兩州之人悉爲奴擄老弱者

皆坑之己亥遣史建瑋周德威徇地于邢魏先馳檄以

諭之

案冊府元龜載晉王諭邢洺魏博衛滑諸郡縣檄

諭邢

天祐八年正月周德威等破賊狗地邢洺先馳檄

酤昊

天不弔萬民罹塗炭之災必有英主奮庸忠臣仗

順斬

長鯨而清四海靖祚祿以泰三靈予位忝維城任

當分

圖念茲顛覆詎可晏安故仗威文輔合之規問羿

浞凶

狂之罪逆溫碭山庸隸巢孽餘凶當僖宗奔播之

初我

太祖掃平之際束身泥首請命牙門苞藏姦詐之

心惟

示婦人之態我太祖俯憐窮鳥曲爲開懷特發表

章請

帥梁汴纔出荏蒲之澤便居茅社之尊殊不感恩

遽行

猜忍我國家祚隆周漢述盛伊唐二十聖之鉉基

三

百年之文物外則五侯九伯內則百辟千官或代襲

簪纓

或門傳忠孝皆遭陷害永抱沉寃且鎮定兩藩國

家巨

鎮冀安民而保族咸屈節以稱藩逆溫唯仗陰謀

專行

不義欲全吞噬先據屬州趙州特發使車來求援

助予

情惟溫寇義切親仁躬率賦輿赴茲盟約賊將王

景仁

將兵十萬屯據栢鄉遂驅三鎮之師授以七擒之

畧

鵲鵲纔列梟獍大奔易如走坂之九勢若燎原之火

僵尸仆地流血成川組甲雕戈皆投草莽謀夫猛將盡
作俘囚羣凶既快于天誅大慙須垂于鬼錄今則選蒐
兵甲簡練車徒乘勝長驅翦除元惡凡爾魏博邢洛之
眾感恩懷義之人乃祖乃孫爲聖唐赤子豈狗虎狼之
黨遂忘覆載之恩蓋以封豕長蛇馮陵荐食無方逃難
遂被脅從空嘗膽以銜冤竟無門而雪憤既聞告捷想
所慰懷今義旅徂征止于招撫昔耿純焚廬而向順蕭
何舉族以從軍皆審料興亡能圖富貴殊勲茂業翼子
貽孫轉禍見機決在今日若能詣轅門而效順開城堡
以迎降長官則改補官資百姓則優加賞賜所經誑誤
更不推窮三鎮諸軍已申嚴令不得焚燒廬舍剽掠馬
牛但仰所在生靈各安耕織子恭行天罰罪止元凶已
外歸明一切不問凡帝御親軍南征庚子至洺州梁祖
爾士眾咸諒予懷

令其將徐仁浦將兵五百夜入邢州張承業李存璋以
三鎮步兵攻邢州遣周德威史建瑋將三千騎長驅至
洺魏帝與李嗣源率親軍繼進二月戊午師次洹水周

德威進至臨河己未魏帥羅周翰出兵五千塞石灰窰口周德威以騎掩擊迫入觀音門是日王師迫魏州帝舍于狄公祠西周翰閉壁自固帝軍攻之其城幾陷帝歎曰予爲兒童時從先王渡河今其忘矣方春桃花水滿思一觀之誰從予者癸亥帝觀河于黎陽是時梁祖發兵萬餘將渡河聞王師至棄舟而退黎陽都將張從楚曹儒以部下兵三千人來降立其軍爲左右匡霸使乙丑周德威自臨清徇地貝郡攻博州下東武朝城時澶州刺史張可臻棄城而遁遂入黎陽下臨河淇門庚午梁祖在洛聞王師將攻河陽率親軍屯白馬坡壬申

帝下令班師帝至趙州王鎔迎謁翌日大饗諸軍壬午
帝發趙州歸晉陽留周德威戍趙州三月己丑鎮定州
各遣使言幽州劉守光凶僭之狀請推爲尙父以稔其
惡乙未帝至晉陽宮召監軍張承業諸將等議幽州之
事乃遣牙將戴漢超齎墨制并六鎮書推劉守光爲尙
書令尙父守光由是凶熾日甚遂邀六鎮奉册五月六
鎮使至幽梁使亦集通鑑攷異引莊宗實錄云三月己丑鎮州遣押衙劉光業至言劉守
光凶淫縱毒欲自尊大請稔其惡以咎之推爲尙父乙未上至晉陽宮召張承業諸將等議討燕之謀諸將亦
云宜稔其惡上令押衙戴漢超持墨制及六鎮書如幽州其辭曰天祐八年三月二十七日天德軍節度使宋
瑤振武節度使周德威昭義節度使李嗣昭易定節度使王處直鎮州節度使王鎔河東節度使尙書令晉王

謹奉冊進盧龍橫海等軍節度檢校太尉中書令燕王
爲尚書令尚父五月六鎮使至汴使亦集六月守光令
有司定尚父採訪使議是月梁祖遣都招討使楊師厚將兵三萬

屯邢州帝令李嗣昭出師掠相衛而還秋七月帝會王
鎔于承天軍鎔武皇之友也帝奉之盡敬捧卮酒爲壽
鎔亦捧酒醕帝鎔幼子昭誨從行因許爲婚八月甲子
幽州劉守光僭稱大燕皇帝年號應天九月庚子梁祖
將親軍自洛渡河而北至相州聞帝軍未出乃止十月
幽州劉守光殺帝之行人李承勲忿其不行朝禮也十
一月辛丑燕人侵易定王處直來告難十二月甲子帝
遣周德威劉光濬李嗣源及諸將率蕃漢之兵發晉陽

伐劉守光于幽州

永樂大典卷七
千一百五十五

舊五代史卷二十七終

舊五代史卷二十七攷證

唐莊宗紀一及武皇之討王行瑜帝時年十一 案歐陽史從是書作十一吳縝纂誤據徐無黨注莊宗年四十三逆推之當以甲辰年生乾寧二年破王行瑜時當云年十二今攷五代會要莊宗以光啟元年生年四十二北夢瑣言載莊宗獻王行瑜捷年十一薛歐二史俱同徐注作年四十三誤

汴將氏叔琮康懷英 案懷英本名懷貞後因避梁末帝諱始改名懷英是書前後統作懷英今仍其舊

周德威宿兵于亂柳 亂柳原本作亂楊攷歐陽史作

亂柳胡三省通鑑注云亂柳在潞州屯留縣界今改正

以并汾九州歸附于梁 案并汾九州通鑑作河東九州胡三省注云河東領并遼沁汾石忻代嵐憲九州附識于此

承業曰臣受命先王 案先王原本作先帝攷晉王嗣位之初武皇尙未追稱爲帝今改正

二月壬戌 壬戌原本作丙戌今據通鑑改正
至潞州北黃碾下營 黃碾原本作黃碾通鑑作黃碾
胡三省注云黃碾村在潞州潞城縣今改正

初唐龍紀元年帝纔五歲 案歐陽史克用破孟方立
于邢州還軍上黨置酒三垂岡時莊宗在側方五歲
攷克用邢州之役在文德元年今以莊宗生年計之
當從是書作龍紀元年

周德威乘勝攻澤州刺史王班登城拒守 案通鑑攷
異引莊宗實錄云李存璋進攻澤州刺史王班棄城
而去與是書異

距柏鄉五里 五里原本作七里今據歐陽史及通鑑
改正

梁軍以五百人爭橋 案通鑑作梁軍橫亙數里競前

奪橋鎮定步兵禦之勢不能支與此微異

率親軍屯白馬坡 白馬坡通鑑作白馬阪

並六鎮書 六鎮原本作大鎮今據通鑑改正

十一月辛丑燕人侵易定 案通鑑作戊申燕主守光

將兵二萬寇易定是書作辛丑與通鑑異

舊五代史卷二十七攷證

舊五代史卷二十八

宋司空同中書門下平章事薛居正等撰

莊宗紀第二

唐書四

天祐九年春正月庚辰朔周德威等自飛狐東下丙戌會鎮定之師進營祁溝庚子次涿州刺史劉知溫以城歸順德威進迫幽州守光出兵拒戰燕將王行方等以部下四百人來奔二月庚戌朔梁祖大舉河南之眾以援守光以陝州節度使楊師厚爲招討使河陽李周彝爲副青州賀德倫爲應接使鄆州袁象先爲副甲子梁祖自洛陽趨魏州遣楊師厚李周彝攻鎮州之棗強命

賀德倫攻脩縣三月壬午梁祖自督軍攻棗強甲申城陷屠之時李存審與史建瑋以三千騎屯趙州相與謀曰梁軍若不攻脩城必西攻深冀吾王方北伐以南鄙之事付我輩豈可坐觀其弊乃以八百騎趨冀州扼下博橋令史建瑋李都督分道擒生翌日諸軍皆至獲芻牧者數百人盡殺之縱數人逸去且告晉王至矣建瑋與李都督各領百餘騎旗幟軍號類梁軍與芻牧者雜行暮及賀德倫營門殺守門者縱火大呼俘斬而旋又執芻牧者斷其手令廻梁軍乃夜遁脩人持鉏耨白梃追擊之悉獲其輜重

通鑑後梁紀云帝燒營夜遁迷失道委曲行百五十里戊子旦乃至

冀州穆之耕者皆荷鋤奮挺逐之委棄軍資器械不可勝計

梁祖聞之大駭自棗強

馳歸貝州殺其將張正言許從實朱彥柔以其亡師于
蓐故也梁祖先抱痼疾因是愈甚辛丑滄州都將張萬
進殺留後劉繼威自爲滄帥遣人送款于梁亦乞降于
帝戊申周德威遣李存暉攻瓦橋關下之四月丁巳梁
祖自魏南歸疾篤故也戊申李嗣源攻瀛州拔之五月
乙卯朔周德威大破燕軍于羊頭岡擒大將軍廷珪斬
首五千餘級德威自涿州進軍于幽州營于城下閏月
己酉攻其西門燕人出戰敗之六月戊寅梁祖爲其子
友珪所弑友珪僭卽帝位于洛陽秋八月朱友珪遣其

將韓勅康懷英牛存節率兵五萬急攻河中朱友謙遣使來求援帝命李存審率師救之十月癸未帝自澤州路赴河中遇梁將康懷英于平陽破之斬首千餘級追至白徑嶺朱友謙會帝于猗氏梁軍解圍而去庚申周德威報劉守光三遣使乞和不報丁卯燕將趙行實來奔天祐十年春正月丁巳周德威攻下順州獲刺史王在思二月甲戌朔攻下安遠軍獲燕將一十八人庚寅梁朱友珪爲其將袁象先所殺均王友貞卽位于汴州丙申周德威報檀州刺史陳確以城降三月甲辰朔收盧臺軍乙丑收古北口時居庸關使胡令珪等與諸戍

將相繼挈族來奔丙戌武州刺史高行珪遣使乞降時
劉守光遣愛將元行欽牧馬于山北聞行珪有變率戍
兵攻行珪行珪遣其弟行溫爲質且乞應援周德威遣
李嗣源李嗣本安金全率兵救武州降元行欽以歸四
月甲申燕將李暉等二千餘人舉族來奔德威攻幽州
南門壬辰劉守光遣使王遵化致書哀祈于德威德威
戲遵化曰大燕皇帝尙未郊天何怯劣如是耶守光再
遣哀祈德威乃以狀聞己亥劉光濬攻下平州獲刺史
張在吉五月壬寅朔光濬進迫營州刺史楊靖以城降
乙巳梁將楊師厚會劉守奇率大軍侵鎮州時帝之先

鋒將史建瑋自趙州率五百騎入眞定師厚大掠鎮冀之屬邑王鎔告急于周德威德威分兵赴援師厚移軍寇滄州張萬進懼遂降于梁六月壬申朔帝遣監軍張承業至幽州與周德威會議軍事秋七月承業與德威率千騎至幽州西守光遣人持信箭一隻乞脩和好承業曰燕師當令子弟一人爲質則可是日燕將司全爽等十一人並舉族來奔辛亥德威進攻諸城門壬子賊將楊師貴等五千人來降甲子五院軍使李信攻下莫州時守光繼遣人乞降將緩帝軍陰令其將孟脩阮通謀于滄州節度使劉守奇及求援于楊師厚帝之游騎

擒其使以獻是月帝會王鎔于天長九月劉守光率眾
夜出遂陷順州冬十月己巳劉守光帥七百騎步軍五
千夜入檀州庚午周德威自涿州將兵躡之壬申守光
自檀州南山而遁德威追及大敗之獲大將李劉張景
紹及將吏八百五十人馬一百五十匹守光得百餘騎
遁入山谷德威急馳扼其城門守光惟與親將李小喜
等七騎奔入燕城己丑守光遣牙將劉化脩周遵業等
以書幣哀祈德威庚寅守光乘城以病告復令人獻自
乘馬玉鞍勒易德威所乘馬而去俄而劉光濬擒送守
光僞殿直二十五人于軍門守光又乘城謂德威曰子

俟晉王至卽泥首俟命祈德威卽馳驛以聞十一月己

亥朔帝下令親征幽州甲辰發晉陽

案歐陽史作十月劉守光請降王如

幽州據薛史則帝發晉陽在十一月甲辰非十月也通鑑從薛史

己未至范陽辛酉守

光奉禮幣歸款于帝帝單騎臨城邀守光辭以佗日蓋

爲其親將李小喜所扼也是夕小喜來奔帝下令諸軍

詰旦攻城王成梯輦並進軍士畢登帝登燕丹塚以觀

之有頃擒劉仁恭以獻癸亥帝入燕城諸將畢賀十二

月庚午墨制授周德威幽州節度使癸酉檀州燕樂縣

人執劉守光并妻李氏祝氏子繼祚以獻己卯帝下令

班師自雲代而旋時鎮州王鎔定州王處直遣使請帝

由井陘而西許之庚辰帝發幽州攜仁恭父子以行甲
申次定州舍于關城翌日次曲陽與王處直謁北嶽祠
是日次行唐鎮州王鎔迎謁于路天祐十一年春正月
戊戌朔王鎔以履新之日與其子昭祚昭誨奉觴上壽
置宴鎔啟曰燕主劉太師頃爲鄰國今欲挹其風儀可
乎帝卽命主曰破械引仁恭守光至與之同宴鎔饋以
衣被飲食已亥帝發鎮州因與王鎔畋于行唐之西王
子至晉陽以組繫仁恭守光號令而入是日誅守光遣
大將李存霸拘送仁恭于代州刺其心血奠告于武皇
陵然後斬之

案遼史太祖紀七年正月晉王李存勗拔幽州擒劉守光考遼太祖七年卽天祐十

年莊宗以天祐十年冬始拔幽州十一年正月乃凱旋也遼史誤以次年事先一年書之是月鎮州王鎔定州王處直遣使推帝爲尙書令初王鎔稱藩于梁梁以鎔爲尙書令至是鎮定以帝南破梁軍北定幽薊乃共推崇焉使三至帝讓乃從之遂選日受冊開霸府建行臺如武德故事秋七月帝親將自黃沙嶺東下會鎮人進軍邢洺梁將楊師厚軍於漳東帝軍次張公橋旣而裨將曹進金奔于梁帝軍不利而退八月還晉陽天祐十二年三月梁魏博節度使賀德倫遣使奉幣乞盟時楊師厚卒于魏州梁主乃割相衛澶三州別爲一鎮以德倫爲魏博節度使以張筠爲相州節度使魏

人不從是月二十九日夜魏軍作亂囚德倫于牙署三

軍大掠軍士有張彥者素實凶暴爲亂軍之首迫德倫

上章請却復六州之地梁主不從遂迫德倫歸于帝且

乞師爲援帝命馬步總管李存審自趙州帥師屯臨清

帝自晉陽東下與存審會

通鑑晉王引大軍自黃澤嶺東下與存審會于臨清猶疑

魏人之詐

按兵不進賀德倫遣從事司空頌至軍密啟張彥狂勃

之狀且曰若不翦此亂階恐貽後悔帝默然遂進軍永

濟張彥謁見以銀槍効節五百人從皆被甲持兵以自

衛帝登樓諭之曰汝等在城濫殺平人奪其妻女數日

以來迎訴者甚眾當斬汝等以謝鄴人遂令斬彥及同

惡者七人軍士服慄帝親加慰撫而退翌日帝輕裘緩策而進令張彥部下軍士被甲持兵環馬而從命爲帳前銀槍眾心大服梁將劉鄩聞帝至以精兵萬人自洹水趣魏縣帝命李存審帥師禦之帝率親軍于魏縣西北夾河爲柵六月庚寅朔帝入魏州賀德倫上符印請帝兼領魏州帝從之墨制授德倫大同軍節度令取便路赴任帝下令撫諭鄴人軍城畏肅民心大服是時以貝州張源德據壘拒命南通劉鄩又與滄州首尾相應聞德州無備遣別將襲之遂拔其城命遼州牙將馬通爲德州刺史以扼滄貝之路秋七月梁澶州刺史王彥

章棄城而遁畏帝軍之逼也以故將李巖爲澶州刺史
帝至魏縣因率百餘騎覘梁軍之營是日陰晦劉鄩伏
兵五千于河曲叢木間帝至伏兵忽起大躁而來圍帝
數十重帝以百騎馳突奮擊梁軍辟易決圍而出有頃
援軍至乃解帝顧謂軍士曰幾爲賊所笑是月劉鄩潛
師由黃澤西趨晉陽至樂平而還遂軍于宗城初鄩在
洹水數日不出寂無聲迹帝遣騎觀之無斥候者城中
亦無烟火之狀但有鳥止于壘上時見旗幟循堞往來
帝曰我聞劉鄩用兵一步百變必以詭計悞我使視城
中乃縛旗于芻偶之上使驢負之循堞而行得城中贏

老者詰之云軍去已二日矣既而有人自鄴軍至者言兵已趨黃澤帝遽發騎追之時霖雨積旬鄴軍倍道兼行皆腹疾足腫加以山路險阻崖谷泥滑緣蘿引葛方得少進顛墜巖坂陷于泥淖而死者十二三前軍至樂平糗糒將竭聞帝軍追躡于後太原之眾在前羣情大駭鄴收合其眾還自邢州陳宋口渡漳水而東駐于宗城時魏之軍儲已乏臨清積粟所在鄴欲引軍據之周德威初聞鄴軍之西自幽州率千騎至土門及鄴軍東下急趨南宮知鄴軍在宗城遣十餘騎迫其營擒斥候者斷其腕令還德威至臨清鄴起軍駐貝州帝率親騎

次博州鄆軍于堂邑周德威自臨清率五百騎躡之是日鄆軍于莘縣帝營于莘西一舍城壘相望日夕交鬪八月梁將賀瓖襲取澶州帝遣李存審率兵五千攻貝州因塹而圍之冬十月有軍士自鄆軍來奔帝善待之乃劉鄆密令齎酖賂帝膳夫欲寘毒于食中會有告者索其黨誅之天祐十三年春二月帝知劉鄆將謀速戰乃聲言歸晉陽以誘之實勞軍于貝州也令李存審守其營鄆謂帝已臨晉陽將乘虛襲鄴三月鄆遣其將楊延直自澶州率兵萬人會于城下夜半至于南門之外城中潛出壯士五百人突入延直之軍譟聲動地梁軍

自亂遲明鄴自莘引軍至城東與延直兵會鄴之來也
李存審率兵踵其後李嗣源自魏城出戰俄而帝自貝
州至鄴卒見帝驚曰晉王耶因引軍漸却至故城西李
存審大軍已成列矣軍前後爲方陣梁軍于其間爲圓
陣四面受敵兩軍初合梁軍稍衄再合鄴引騎軍突西
南而走帝以騎軍追擊之梁步軍合戰短兵旣接帝軍
鼓譟圍之數重埃塵漲天李嗣源以千騎突入其間眾
皆披靡相躡如積帝軍四面斬擊棄甲之聲聞數十里
眾旣奔潰帝之騎軍追及于河上十百爲羣赴水而死
梁步兵七萬殲亡殆盡劉鄴自黎陽濟奔滑州是月梁

主遣別將王檀率兵五萬自陰地關趨晉陽急攻其城
昭義李嗣昭遣將石嘉才率騎三百赴援時安金全張
承業堅守于內嘉才救援于外檀懼乃燒營而遁追擊
于陰地關時劉鄩敗于莘縣王檀遁于晉陽梁主聞之
曰吾事去矣三月乙卯朔分兵以攻衛州壬戌刺史米
昭以城降夏四月攻洛州下之五月帝還晉陽六月命
偏師攻閭寶于邢州梁主遣捉生都將張溫率步騎五
百爲援至內黃溫率眾來奔秋七月甲申朔帝自晉陽
至魏州八月大閱師徒進攻邢州相州節度使張筠棄
城遁去以袁建豐爲相州刺史依舊隸魏州邢州節度

使閻寶請以城降以忻州刺史蕃漢副總管李存審爲

邢州節度使以閻寶爲西南面招討使遙領天平軍節

使是月契丹入蔚州

案歐陽史及通鑑俱從薛史作蔚州遼史太祖紀神冊元年拔朔州

擒節度使李嗣本與薛史異

振武節度使李嗣本陷于契丹九月帝

還晉陽梁滄州節度使戴思遠棄城遁去舊將毛璋入

據其城李嗣源帥師招撫璋以城降乃以李存審爲滄

州節度使以李嗣源爲邢州節度使時契丹犯塞帝領

親軍北征至代州北聞蔚州陷乃班師

案遼史太祖紀十一月攻蔚新

武嬌儒五州自代北至河曲踰陰山盡有其地其圍蔚州敵樓無故自壞眾軍大譟乘之不踰時而破蓋由朔州進破蔚州也通鑑作晉王自將兵救雲州契丹聞之引去與遼史異

是月貝州平以滄

州降將毛璋爲貝州刺史自是河朔悉爲帝所有帝自
晉陽復至于魏州天祐十四年二月帝聞劉鄩復收殘
兵保守黎陽遂率師以攻之不克而還是月甲午新州
將盧文進殺節度使李存矩叛入契丹遂引契丹之眾
寇新州存矩帝之諸弟也治民失政御下無恩故及于

禍帝以契丹王案巴堅

舊作阿保
機今改正

與武皇屢盟于雲中

約爲兄弟急難相救至是容納叛將違盟犯塞乃馳書
以讓之契丹攻新州甚急刺史安金全棄城而遁契丹
以文進部將劉殷爲刺史帝命周德威率兵三萬攻之
營于城東俄而文進引契丹大至德威拔營而歸因爲

契丹追躡師徒多喪契丹乘勝寇幽州是時言契丹者或云五十萬或云百萬漁陽以北山谷之間羶車毳幕羊馬彌漫盧文進招誘幽州亡命之人教契丹爲攻城之具飛梯衝車之類畢陳于城下鑿地道起土山四面攻城半月之間機變百端城中隨機以應之僅得保全軍民困弊上下恐懼德威間道馳使以聞帝憂形于色召諸將會議時李存審請急救燕薊且曰我若猶豫未行但恐城中生事李嗣源曰願假臣突騎五千以破契丹閻寶曰但當蒐選銳兵控制山險強弓勁弩設伏待之帝曰吾有三將無復憂矣夏四月命李嗣源率師赴

援次于涑水又遣閻寶率師夜過祁溝俘擒而還周德威遣人告李嗣源曰契丹三十萬馬牛不知其數近日所食羊馬過半案巴堅責讓盧文進深悔其來契丹勝兵散布射獵案巴堅帳前不滿萬人宜夜出奇兵掩其

不備嗣源具以事聞

案遼史太祖紀四月圍幽州不克六月乙巳望城中有氣如烟火狀

上曰未可攻也以大暑霖潦班師留盧國用守之秋七是契丹主已于六月退師矣薛史及通鑑皆不載

月辛未帝遣李存審領軍與嗣源會于易州步騎凡七萬于是三將同謀銜枚束甲尋澗谷而行直抵幽州八月甲午自易州北循山而行李嗣源率三千騎爲前鋒庚子循大房嶺而東距幽州六十里契丹萬騎遽至存

審嗣源極力以拒之契丹大敗委棄毳幕瓊廬弓矢羊馬不可勝紀進軍追討俘斬萬計辛丑大軍入幽州德威見諸將握手流涕翌日獻捷于鄴九月班師帝授存審檢校太傅嗣源檢校太保閭寶加同平章事十月帝自魏州還晉陽十一月復至魏州十二月帝觀兵于河上時梁人據楊劉城列柵相望帝率軍履河冰而渡盡平諸柵進攻楊劉城城中守兵三千人帝率騎軍環城馳射又令步兵持斧斬其鹿角負葭葦以堙塹帝白負一團而進諸軍鼓譟而登遂拔其壘獲守將安彥之是夕帝宿楊劉天祐十五年春正月帝軍狗地至鄆濮時

梁主在洛將修郊禮聞楊劉失守狼狽而還二月梁將謝彥章帥眾數萬來迫楊劉築壘以自固又決河水瀾漫數里以限帝軍六月壬戌帝自魏州復至楊劉甲子率諸軍涉水而進梁人臨水拒戰帝軍小却俄而鼓譟復進梁軍漸退因乘勢而擊之交鬪于中流梁軍大敗殺傷甚眾河水如絳謝彥章僅得免去是月淮南楊溥遣使來會兵將致討于梁也秋八月辛丑朔大閱于魏郊河東魏博幽滄鎮定邢洛麟勝雲朔十鎮之師及奚契丹室韋吐渾之眾十餘萬部陣嚴肅旌甲照耀師旅之盛近代爲最己酉梁兗州節度使張萬進遣使歸款

帝自魏州率師次于楊劉畧地至鄆濮而還遂營于麻家渡諸鎮列營十數梁將賀瓌謝彥章以軍屯濮州行臺村結壘相持百餘日帝嘗以數百騎摩壘求戰謝彥章帥精兵五千伏于堤下帝以十餘騎登堤伏兵發圍帝十數重俄而帝之騎軍繼至攻于圍外帝于圍中躍馬奮擊決圍而出李存審兵至梁軍方退是時帝銳于接戰每馳騎出營存審必叩馬進諫帝伺存審有間卽策馬而出顧左右曰老子妨吾戲耳至是幾危方以存審之言爲忠也十二月庚子朔帝進軍距梁軍柵十里而止時梁將賀瓌殺騎將謝彥章于軍帝聞之曰賊帥

自相魚肉安得不亡戊午下令軍中老幼令歸魏州悉
兵以趣汴庚申大軍毀營而進辛酉次于臨濮梁軍捨
營踵于後癸亥次胡柳陂遲明梁軍亦至帝率親軍出
視諸軍從之梁軍已成陣橫亘數十里帝亦以橫陣抗
之時帝與李存審總河東魏博之眾居其中周德威以
幽薊之師當其西鎮定之師當其東梁將賀瓌王彥章
全軍接戰帝以銀槍突入梁軍陣中斬擊十餘里賀瓌
王彥章單騎走濮陽帝軍輜重在陣西望見梁軍旗幟
皆驚走因自相蹈籍不能禁止帝一軍先敗周德威戰
歿是時陂中有土山梁軍數萬先據之帝帥中軍至山

下梁軍嚴整不動旗幟甚盛帝呼諸軍曰今日之戰得
山者勝賊已據山吾與爾等各馳一騎以奪之帝率軍
先登銀槍步兵繼進遂奪其山梁軍紛紜而下復于土
山西結陣數里時日已晡矣或曰諸軍未齊不如還營
詰朝可圖再戰閻寶曰深入賊境逢其大敵期于盡銳
以決雌雄況賊帥奔亡眾心方恐今乘高擊下勢如破
竹矣銀槍都將王建及被甲橫槊進曰賊將先已奔亡
王之騎軍一無所損賊眾晡晚大半思歸擊之必破王
但登山縱觀責臣以破賊之效于是李嗣昭領騎軍自
土山北以逼梁軍王建及呼士眾曰今日所失輜重並

在山下乃大呼以奮擊諸軍繼之梁軍大敗時元城令
吳瓊貴鄉令胡裝各部役徒萬人于山下曳柴揚塵鼓
譟助其勢梁軍不之測自相騰籍棄甲山積甲子命行
戰場收獲鎧仗不知其數時帝之軍士有先入大梁問
其次舍者梁人大恐驅市人以守其殘眾奔歸汴者不
滿千人帝軍遂拔濮陽

永樂大典卷七
千一百五十六

舊五代史卷二十八終

舊五代史卷二十八攷證

唐莊宗紀二梁祖自督軍攻棗強甲申城陷屠之 甲申通鑑作丙戌

周德威大破燕軍于羊頭岡 案通鑑作龍頭岡攷異引莊宗實錄作羊頭岡

遣使推帝爲尙書令 案通鑑攷異引唐實錄云天祐八年晉王已稱尙書令是書作天祐十一年與唐實錄異

是月二十九日夜 案通鑑攷異引莊宗實錄作二十七日今攷是書賀德倫傳作二十九日與此紀合

以故將李巖爲澶州刺史 李巖通鑑攷異引莊宗實

錄作李巖

決圍而出 案通鑑作自午至申乃得出亡其七騎

遣將石嘉才 嘉才梁紀作家才唐列傳作家財

以袁建豐爲相州刺史依舊隸魏州 案通鑑作四月

晉人拔洺州以魏州都巡檢使袁建豐爲洺州刺史

八月晉人復以相州隸天雄軍以李嗣源爲刺史與

是書異

是月淮南楊溥遣使來會兵將致討于梁也 案十國

春秋吳世家作七月晉王李存勗遣間使持帛書會

兵伐梁王辭以虔州之難與是書異

舊五代史卷二十八攷證

舊五代史卷二十九

宋司空同中書門下平章事薛居正等撰

莊宗紀第三

唐書五

天祐十六年春正月李存審城德勝夾河爲柵帝還魏州命昭義軍節度使李嗣昭權知幽州軍府事三月帝兼領幽州遣近臣李紹宏提舉府事夏四月梁將賀瓌圍德勝南城百道攻擊復以艤艦扼斷津渡帝馳而往陣于北岸南城守將氏延賞告急且言矢石將盡帝以重賄召募能破賊艦者于是獻技者數十或言能吐火焚舟或言能禁呪兵刃悉命試之無驗帝憂形于色親

從都將王建及進曰臣請效命乃以巨索連舟十艘選效節勇士三百人持斧被鎧鼓柂而進至中流梁樓舩三層蒙以牛革懸板爲楯建及率持斧者入艨艟間斬其竹竿破其懸楯又于上流取甕數百用竹竿維之積薪于上灌以脂膏火發亘空又以巨艦載甲士令乘煙鼓譟梁之樓舩斷絕而下沉溺者殆半軍旣得渡梁軍乃退命騎軍追襲至濮陽俘斬千計賀瓌由此飲氣邁疾而卒秋七月帝歸晉陽八月梁將王瓚帥眾數萬自黎陽渡河營于楊村造舟爲梁以通津路冬十月帝自晉陽至魏州發徒數萬以廣德勝北城自是日與梁軍

接戰十二月戊戌帝軍于河南夜伏步兵于潘張村梁軍寨下以騎軍掠其餉運擒其斥候梁王瓚結陣以待帝軍以鐵騎突之諸軍繼進梁軍大奔赴水死者甚眾瓚走保北城天祐十七年春幽州民于田中得金印文曰關中龜印李紹宏獻于行臺秋七月梁將劉鄩尹皓寇同州先是河中節度使朱友謙取同州以其子令德主留務請梁主降節梁主怒不與遂請旄節于帝梁主乃遣劉鄩與華州節度使尹皓帥兵圍同州友謙來告難帝遣蕃漢總管李存審昭義節度使李嗣昭代州刺史王建及率師赴援九月師至河中朝至夕濟梁人不

意王師之至望之大駭明日約戰與朱友謙謀遲明進軍距梁壘梁人悉眾以出蒲人在南王師在北騎軍旣接蒲人小却李嗣昭以輕騎抗之梁軍奔潰追斬二千餘級是夜劉鄩收餘眾保營自是閉壁不出數日鄩遂宵遁王師追及于渭河所棄兵仗輜重不可勝計劉鄩尹皓單騎獲免未幾鄩憂恚發病卒

案梁書劉鄩傳作遇酖而卒與唐紀

異

王師畧地至奉先嗣昭因謁唐帝諸陵而還天祐十

八年春正月魏州開元寺僧傳眞獲傳國寶獻于行臺

驗其文卽受命于天子孫寶之八字也羣寮稱賀

案自開元

寺至此三十三字原本闕佚今從冊府元龜增入

傳眞師于廣明中遇京師喪

亂得之秘藏已四十年矣篆文古體人不之識至是獻之時淮南楊溥西川王衍皆遣使致書勸帝嗣唐帝位帝不從二月代州刺史王建及卒是月鎮州大將張文禮殺其帥王鎔時帝方與諸將宴酒酣樂作聞鎔遇弑遽投解而泣曰趙王與吾把臂同盟分如金石何負于人覆宗絕祀冤哉先是溥沱暴漲漂闕城之半溺死者千計是歲天西北有赤祲如血占者言趙分之災至是果驗時張文禮遣使請旄節于帝帝曰文禮之罪期于無赦敢邀予旄節左右曰方今事繁不欲與人生事帝不得已而從之乃承制授文禮鎮州兵馬留後三月河

中節度使朱友謙昭義節度使李嗣昭滄州節度使李
存審定州節度使王處直邢州節度使李嗣源成德軍
兵馬留後張文禮遙領天平軍節度使閻寶大同軍節
度使李存璋新州節度使王郁振武節度使李存進同
州節度使朱令德各遣使勸進請帝紹唐帝位帝報書
不允自是諸鎮凡三上章勸進各獻貨幣數十萬以助
卽位之費帝左右亦勸帝早副人望帝搃挹久之九國志趙
季良傳季良嘗夢手扶御座自謂輔佐之象秋七月河
由是頗述天時人事以諷莊宗深納其言東節度副使盧汝弼卒八月庚申令天平節度使閻寶
成德兵馬留後符習率兵討張文禮于鎮州初王鎔令

偏將符習以本部兵從帝屯于德勝文禮旣行弑逆忌
鎔故將多被誅戮因遣使聞于帝欲以佗兵代習歸鎮
習等懼請留帝令傳旨于習及別將趙仁貞烏震等明
正文禮弑逆之罪且言爾等荷戟從征蓋君父之故銜
冤報恩誰人無心吾當給爾資糧助爾兵甲當試思之
於是習等率諸將三十餘人慟哭于牙門請討文禮帝
因授習成德軍兵馬留後以部下鎮冀兵致討于文禮
又遣閻寶以助之以史建瑋爲前鋒甲子攻趙州刺史
王鎰送符印以迎閻寶遂引軍至鎮州城下營于西北
隅是月張文禮病疽而卒其子處瑾代掌軍事九月前

鋒將史建瑋與鎮人戰于城下爲流矢所中而卒冬十月己未梁將戴思遠攻德勝北城帝命李嗣源設伏于戚城令騎軍挑戰梁軍大至帝御中軍以禦之時李從珂僞爲梁幟奔入梁壘斧其眺樓持級而還梁軍愈恐步兵漸至李嗣源以鐵騎三千乘之梁軍大敗俘斬二萬計辛酉閻寶上言定州節度使王處直爲其子都幽于別室都自稱留後

歐陽史王處直叛附于契丹其子都幽處直以來附

十一月

帝至鎮州城下張處瑾遣弟處琪幕客齊儉等候帝乞降言猶不遜帝命囚之時王師築土山以攻其壘城中亦起土山以拒之旬日之間機巧百變張處瑾令韓正

時以千騎夜突圍將入定州與王處直議事爲我游軍

追擊破之餘眾保行唐賊將彭贊斬正時以降十二月

辛未王郁誘契丹案巴堅

契丹國志王處直在定州以鎮定爲唇齒恐鎮亡而定孤

乃潛使人語其子王郁使賂契丹令犯塞以救鎮州之

圍王郁說太祖曰鎮州美女如雲金帛似山天皇速往

則皆爲已物也不然則爲晉王寇幽州遂引軍涿州陷

所有矣太祖以爲然率眾而南又寇定州王都遣

之案契丹陷涿州在天祐十八年李使告急帝自鎮州率五千騎赴之天祐十九年春正月

甲午帝至新城契丹則三千騎至新樂是時梁將戴

思遠乘虛以寇魏州軍至魏店李嗣源自領兵馳入魏州梁人知其有備乃西渡洹水陷成安而去時契丹渡

沙河而諸將相顧失色又聞梁人內侵鄴城危急皆請
旋師唯帝謂不可乃率親騎至新城契丹萬餘騎遽見
帝軍惶駭而退帝分軍爲二廣追躡數十里獲案巴堅
之子時沙河水薄橋梁隘狹敵爭踐而過陷溺者甚眾
案巴堅方在定州聞前軍敗退保望都帝至定州王都
迎謁是夜宿于開元寺翌日引軍至望都契丹逆戰帝
身先士伍馳擊數四敵退而結陣帝之徒兵亦陣于水
次李嗣昭躍馬奮擊敵眾大潰俘斬數千追擊至易水
獲氈裘毳幕羊馬不可勝紀時歲且北至大雪平地五
尺敵乏芻糧人馬斃踣道路纍纍不絕帝乘勝追襲至

幽州

契丹國志晉王趨望都爲契丹所圍力戰出入數四不解李嗣昭引三百騎橫擊之晉王始得出因

縱兵奮擊太祖兵敗遂北至易州會大雪是月梁將戴彌旬平地數尺人馬死者相屬太祖乃歸

思遠寇德勝北城築壘穿塹地道雲梯晝夜攻擊李存審極力拒守城中危急帝自幽州聞之倍道兼行以赴

梁人聞帝至燒營而遁三月丙午王師敗于鎮州城下

閻寶退保趙州時鎮州累月受圍城中艱食王師築壘環之又決滹沱水以絕城中出路是日城中軍出攻其長圍皆奮力死戰王師不能拒引師而退鎮人壞其營壘取其芻糧者累日帝聞失律卽以昭義節度使李嗣昭爲北面招討使進攻鎮州夏四月嗣昭爲流矢所中

卒于師已卯天平節度使閻寶卒以振武節度使李存
進爲北面招討使是月大同軍節度使李存璋卒五月
乙酉李存進圍鎮州營于東渡八月梁將段凝陷衛州
刺史李存儒被擒存儒本俳優也帝以其有膂力故用
爲衛州刺史旣而誅歛無度人皆怨之故爲梁人所襲
九國志趙季良傳莊宗入鄴時兵革屢興屬邑租賦逋
久一日莊宗召季良切責之季良對曰殿下何時平河
南莊宗正色曰爾掌輿賦而稽緩安問我勝負乎季良
曰殿下方謀攻守復務急徵一旦眾心有變恐河南非
殿下所有莊宗歛容前席梁將戴思遠又陷共城新鄉
日微君之言幾失吾大計等邑自是澶淵之西相州之南皆爲梁人所據九月戊
寅朔張處球悉城中兵奄至東垣渡急攻我之壘門時

騎軍已臨賊城不覺其出李存進惶駭引千餘人闕于橋上賊退我之騎軍前後夾擊之賊眾大敗步兵數千殆無還者是役也李存進戰歿于師以蕃漢馬步總管李存審爲北面招討使以攻鎮州丙午夜趙將李再豐之子冲投縋以接王師諸軍登城遲明畢入鎮州平獲處球處理處琪并其母及同惡高濛李翥齊儉等皆折足送行臺鎮人請醢而食之發張文禮尸磔于市帝以符習爲鎮州節度使烏震爲趙州刺史趙仁貞爲深州刺史李再豐爲冀州刺史鎮人請帝兼領本鎮從之乃以符習遙領天平軍節度使十一月河東監軍張承業

卒十二月以魏州觀察判官張憲權知鎮州軍州事

同光元年春正月丙子五臺山僧獻銅鼎三言於山中
石崖間得之二月新州團練使李嗣肱卒是時以諸藩
鎮相繼上牋勸進乃命有司制置百官省寺仗衛法物
期以四月行卽位之禮以河東節度判官盧質爲大禮
使三月己卯以橫海軍節度使內外藩漢馬步總管李
存審爲幽州節度使潞州留後李繼韜叛送款于梁是
月梁卽位壇于魏州牙城之南夏四月己巳帝升壇祭
告昊天上帝遂卽皇帝位文武臣寮稱賀禮畢御應天
門宣制改天祐二十年爲同光元年大赦天下自四月

二十五日昧爽以前除十惡五逆放火行劫持杖殺人
官典犯贓屠牛鑄錢合造毒藥外罪無輕重咸赦除之
應蕃漢馬步將校並賜功臣名號超授檢校官已高者
與一子六品正員官兵士並賜等第優給其戰歿功臣
各加追贈仍定謚號民年八十已上與免一子役內外
文武職官並可直言極諫無有隱諱貢選二司宜令有
司速商量施行雲應蔚朔易定幽燕及山後八軍秋夏
稅率量與蠲減民有三世已上不分居者與免雜徭諸
道應有祥瑞不用聞奏赦書有所未該委所司條奏以
聞云是歲自正月不雨人心憂恐宣赦之日澍雨溥降

初唐咸通中金水土火四星聚于畢昴太史奏畢昴趙
魏之分其下將有王者懿宗乃詔令鎮州王景崇被袞
冕攝朝三日遣臣下備儀注軍府稱臣以厭之其後四
十九年帝破梁軍于栢鄉平定趙魏至是卽位于鄴宮
是月以行臺左丞相豆盧革爲門下侍郎同中書門下
平章事太清宮使以行臺右丞相盧澄

案原本作盧登
今從通鑑攷異

改正爲中書侍郎平章事監修國史以前定州掌書紀李
德休爲御史中丞以河東節度判官盧質爲兵部尙書
充翰林學士承旨以河東掌書記馮道爲戶部侍郎充
翰林學士以魏博鎮冀觀察判官張憲爲工部侍郎充

租庸使以中門使郭崇韜昭義監軍使張居翰並爲樞密使以權知幽州軍府事李紹宏爲宣徽使以魏博節度判官王正言爲禮部尙書行興唐尹以河東軍城都虞候孟知祥爲太原尹充西京副留守以澤潞節度判官任圜爲工部尙書兼眞定尹充北京副留守詔升魏州爲東京興唐府改元城縣爲興唐縣貴鄉縣爲廣晉縣以太原爲西京以鎮州爲北都是時所管節度一十三州五十閏月丁丑以李嗣源爲檢校侍中依前橫海軍節度使內外蕃漢副總管以幽州節度使李存審爲檢校太師兼中書令依前蕃漢馬步總管以河東節度

使朱友謙爲檢校太師兼尙書令安國軍節度使符習
加同平章事定州節度使王都加檢校侍中是月追尊
曾祖蔚州太保爲昭烈皇帝廟號懿祖夫人崔氏曰昭
烈皇后追尊皇祖代州太保爲文景皇帝廟號獻祖夫
人秦氏曰文景皇后追尊皇考河東節度使太師中書
令晉王爲武皇帝廟號太祖詔于晉陽立宗廟以高祖
神堯皇帝太宗文皇帝懿宗昭聖皇帝昭宗聖穆皇帝
及懿祖以下爲七廟甲午契丹寇幽州至易定而還時
有自鄆來者言節度使戴思遠領兵在河上州城無守
兵可襲而取之帝召李嗣源謀曰昭義阻命梁將董瑋

攻迫澤州梁志在澤潞不慮別有事生汝陽無備不可
失也嗣源以爲然壬寅命嗣源率步騎五千箝枚自河
趨鄆是夜陰雨我師至城下鄆人不覺遂乘城而入鄆
州平制以李嗣源爲天平軍節度使梁王聞鄆州陷大
恐乃遣王彥章代戴思遠總兵以來拒時朱守殷守德
勝南城帝懼彥章奔衝遂幸澶州五月辛酉彥章夜率
舟師自楊村浮河而下斷德勝之浮橋攻南城陷之帝
令中書焦彥賓馳至楊劉固守其城令朱守殷徹德勝
北城屋木攻具浮河而下以助楊劉是時德勝軍食芻
茭薪炭數十萬計至是令人輦負入澶州事旣倉卒耗

失殆半朱守殷以所毀屋木編柵置步軍于其上王彥章以舟師沿流而下各行一岸每遇轉灘水匯卽中流交鬪流矢雨集或全舟覆沒一彼一此終日百戰比及楊劉殆亡其半己巳王彥章段凝率大軍攻楊劉南城焦彥賓與守城將李周極力固守梁軍晝夜攻擊百道齊進竟不能下遂結營于楊劉之南東西延袤十數柵六月己亥帝親御軍至楊劉登城望見梁軍重壕複壘以絕其路帝乃選勇士持短兵出戰梁軍于城門外連延屈曲穿掘小壕伏甲士于中候帝軍至則弓弩齊發師人傷矢不得進帝患之問計于郭崇韜崇韜請於下

流據河築壘以救鄆州又請帝曰令勇士挑戰旬日之內寇若不至營壘必成帝善之卽令崇韜與毛璋率數千人中夜往博州濟河東晝夜督役居六日營壘將成戊子梁將王彥章杜晏球領徒數萬晨壓帝之新壘時板築雖畢牆仞低庫戰具未備沙城散惡王彥章列騎環城虐用其人使步軍堙壕登堞又于上流下巨艦十餘艘扼斷濟路自旦至午攻擊百端城中危急帝自楊劉引軍陣于西岸城中望之大呼帝艤舟將渡梁軍遂解圍退保鄒家口秋七月丁未帝御軍汭河而南梁軍棄鄒家口夜遁委棄鍋甲芻糧千計戊午遣騎將李紹

賁直抵梁軍壘梁益恐又聞李嗣源自鄆州引大軍將至已未夜梁軍拔營而遁復保于楊村帝軍屯于德勝甲子帝幸楊劉城巡視梁軍故壘八月壬申朔帝遺李紹斌以甲士五千援澤州初李繼韜之叛也潞之舊將裴約以兵戍澤州不徇繼韜之逆旣而梁遣董璋率眾攻其城約拒守久之告急于帝故遣紹斌救之未至而城已陷裴約被害帝聞之嗟痛不已甲戌帝自楊劉歸鄴梁以段凝代王彥章爲帥戊子凝帥眾五萬結營于王村自高陵渡河帝軍遇之生擒梁前鋒軍士二百人戮于都市庚寅帝御軍至朝城戊戌梁左右先鋒指揮

使康延孝領百騎來奔帝虛懷引見賜御衣玉帶屏人問之對曰臣竊觀汴人兵眾不少論其君臣將校則終見敗亡趙巖趙鵠張漢傑居中專政締結宮掖賄賂公行段凝素無武畧一朝便見大用霍彥威王彥章皆宿將有名翻出其下自彥章獲德勝南城梁主亦稍獎使彥章立性剛暴不耐凌制梁主每一發軍卽令近臣監護進止可否悉取監軍處分彥章悒悒形于顏色自河津失利段凝彥章又獻謀欲數道舉軍令董璋以陝虢澤潞之眾趨石會關以寇太原霍彥威統關西汝洛之眾自相衛以寇鎮定段凝杜晏球領大軍以當陛下令

王彥章張漢傑統禁軍以攻鄆州決取十月內大舉又自滑州南決破河堤使水東注曹濮之間至于汶陽瀾漫不絕以陷北軍臣在軍側聞此議臣惟汴人兵力聚則不少分則無餘陛下但待分兵領鐵騎五千自鄆州兼程直抵于汴不旬日天下事定矣帝懌然壯之九月壬寅朔帝在朝城凝兵至臨河南與帝之騎軍接戰是時澤潞叛衛州黎陽爲梁人所據州以西相以南寇抄日至編戶流亡計其軍賦不支半年又王都盧文進召契丹南侵瀛涿及聞梁人將圖大舉帝深憂之召將吏謀其大計或曰自我得汶陽以來須大將固守城門之

外元是賊疆細而料之得不如失今若馳檄告諭梁人
却衛州黎陽以易鄆州指河爲界約且休兵我國力稍
集則議改圖帝曰嘻行此謀則無葬地矣時郭崇韜勸
帝親御六軍直趨汴州半月之間天下可定帝曰正合
朕意大丈夫得則爲王失則爲寇予行計決矣又問司
天監對曰今歲時不利深入必無成功帝弗聽戊辰梁
將王彥章率眾至汶河李嗣源遣騎軍偵視至遞公鎮
案永樂大典原本作遞公鎮今從通鑑考異所
引薛史作遞公鎮通鑑從莊宗實錄作遞坊鎮梁軍來
挑戰嗣源以精騎擊而敗之生擒梁將任釗田章等三
百人俘斬二百級彥章引眾保于中都嗣源飛驛告捷

舊五代史卷二十九
帝置酒大悅曰是當決行渡河之策已已下令軍中將

士家屬並令歸鄴

永樂大典卷七
千一百五十六

舊五代史卷二十九終

舊五代史卷二十九攷證

鎮州大將張文禮殺其帥王鎔 案歐陽史作正月趙
將張文禮弑其君鎔五代春秋作三月趙人張文禮
殺其君鎔與是書繫二月前後互異

行臺右丞相盧澄 盧澄歐陽史作盧程攷北夢瑣言
亦作澄今仍其舊

帝令中書焦彥賓馳至楊劉固守其城 案通鑑作帝
令宦者焦延賓急趨楊劉與鎮使李周固守其城
六月己亥帝親御軍至楊劉 案己亥通鑑作乙亥
帝艤舟將渡梁軍遂解圍 案歐陽史作六月及王彥

章戰于新壘敗之據是書則王彥章因救至而解圍
未嘗敗績也

遣騎將李紹貽 李紹貽通鑑作李紹榮

舊五代史卷二十九攷證